



15
1301
19



門 5
號 1301
卷 19

唐文拾遺卷之六十五

榮祿大夫三品頂戴前分巡廣東高廉道加四級臣陸心源輯
闕名 十三

大唐故辰州辰溪縣令張君墓誌 并序

君諱仁字義實南陽西鄂人也粵若祥禽翊景襄城
參問道之遊瑞獸授圖天偃鷹圮橋之冊博通羣籍
對亡書於鼎川識洞幽微辯孽神於璜浦曾祖嵩隋
貝州清河縣令祖生沙州錄事參軍父寬稟性清虛
不希榮祿無為戰勝賦潘岳之閑居空觀坐忘詠嗣
宗之襟抱遂使揚雄寂寞不謝卿相之尊梁竦清高

昭和十年
二月十四日
購求

耻從州縣之職惟君傳鈞襲慶落印開祥龍節孤標
韻黃鍾於嶰谷鳳條危聳韞白雪於朝陽隱隱詞峯
滔滔學海孔仞成半工之士黃陂爲尺畎之流爰自
弱齡光茲筮仕解褐任太倉丞秩滿遷辰州辰溪縣
令涵斗大鼎享小鮮於一同舞鶴清琴播弦歌於三
善冰壺湛照水鏡凝清戒三惑於機前銘四知於座
右日者南中逆節徼外虜恩聚餘孽於牂牁照明燧
於包□以君文武兼備奉律龔行師不□時殄茲兇
醜是用授公上護軍特加優錫然則絳灌英雄下車
慙撫字之術蒲密佳政揚麾乏禦侮之功兼而有之

實惟君矣鴻漸于陸希參鶴鼎之榮鯨波不留遽兆
□雞之豐以儀鳳二年八月十日春秋六十有二卒
于辰州辰溪縣官第以調露元年十月廿三日葬于
高陽原惟君忠孝稟矢仁義成性芳流桂岳澤潤蘭
泉滑稽臯朔之羣藻績卿雲之筆旣而青萍座鏘白
玉淪光勒芳徽於玄壤將地久兮天長其詞曰
孕靈軒系命氏星弓珠胎產月玉浦暉虹龍生瑞渥
鳳下猗桐彼美之子實代之雄誕秀公族毓粹卿宗
迺文迺武出孝入忠丹青國化幹蠱門風敦詩復禮
善始令終蒲密清政仁洽道豐采縟春□鑒明秋泚

學擯垂帷才優閱市文峯千仞詞瀾萬里繁露蛟申
談玄鳳峙南鄉金玉西巖杞梓日薄崦岫波驚地紀
與善無實夢妖斯□風結松郊雲愁隴趾鏤芳徽於
泉戶庶無昧於年祀石刻

大缺四都督上柱國□□郡開國公孫管真墓

誌

諱真城陽人也顯慶四年八月廿日終於私第春秋
卅有二以調露元年十月十四日收骨於鷄鳴埠禪
師林左起塔石刻

大唐故大都督王府君夫人祿氏墓誌銘 并序

夫人諱□祿氏嫡于太原王善相之妻也若夫鴻源
迥派與四瀆而方深積構崇基將五岳而齊峻芳苗
盛胄代襲簪裾奕葉光華足可言矣乃祖乃宗蟬聯
繼踵譽標朝野謀略有聞奮氣橫衝英雄烈熾惟公
稟靈清幹夙著勲資少事戎行久陪營陣先沉瘡瘵
久奄黃墟作配雙魂早婚祿氏夫人粵以永隆元年
十一月廿七日卒於崇賢之里春秋七十有七卽以
永隆二年二月九日合葬于京城南洪固鄉界韋曲
之禮也孤子□等痛傷脾脞切甚心腸懼陵谷有遷
式旌不朽其詞曰

邈矣華宗崇基峻極嗟乎盛德俄逾晷吳夫人淑姿
奄傾遄電四德久傳六行斯見石刻

大唐濟度寺故比丘尼法樂法師墓誌銘 并序

法師諱法樂俗姓蕭氏蘭陵人也梁武皇帝之五代
孫高祖昭明皇帝曾祖宣皇帝祖孝明皇帝父瑀梁
新安王隨金紫光祿大夫行內史侍郎皇朝中書令
尚書左右僕射特進太子太保上柱國宋國公贈司
空赫奕蟬聯編諸史謀芳猷盛烈可得而詳法師則
太保之長女也勤懇之節及自幼童玄妙之體發於
岐嶷年甫三齡歸誠六度脫履高族落髮祇園旣而

禪室淪精羈象心而有裕法場探秘蘊龍偈而無遺
覺侶攸宗眞門取範而念想云促景落須彌之峯福
應斯甄神升兜率之殿以咸亨三年九月十九日遷
化於蒲州相好之伽藍春秋七十有四摧殞于河東
以永隆二年歲次辛巳三月庚午朔廿三日辛卯歸
窆于雍州明堂縣義川鄉南原禮也恐松壠難固栢
楸終虧式鑄貞石用勒芳規迺爲銘曰
華宗襲慶寶系承仙爰誕柔質歸心福田功登十地
業贊三天神遊法末覺在童先踰筏俄捨慈舟遽捐
幽屏永晦雅譽空傳石刻

大唐故幽州范陽令楊府君夫人韋氏墓誌銘
夫人諱檀特字毘耶梨京兆杜陵人也神臯華實總
陸海之紛敷巨派靈長控八川之決潏珠光集乘已
聞賢之談金氣衝籬寔重聖人之道貂蟬之美相繼
蘭菊之芬不絕夫人魏太傅鄖襄公之曾孫周內史
京兆尹河南公之孫隨尙衣奉御舒國公之第二女
體少陰之精苞太和之靈佩張箴以白勗擁曹誠以
飛馨神彩窈然英姿獨茂庭前白雪得飛絮之奇情
琴裏清風知絕絃之不調年甫十五歸于隨尙書左
丞國子祭酒弘農楊汪第五子幽州范陽縣令政本

河魴之美乘龍之慶休祉冠於二門榮耀覃于九族
足不妄動用遵珩佩之聲口無擇言必叶詩書之味
然而四節流邁百齡飄忽如賓之敬不居遠客之遊
斯盡卅有幾卽喪所天惇惇獨處哀哀長疚撫衾幃
而歎息望閭闔而洞開仙草十洲反魂之語徒說庭
梧半死餘生之望幾何粵以永隆二年八月一日終
于永甯里春秋七十有四卽以其月十八日窆於雍
州明堂縣義口鄉禮也恐雙龍有會將申共穴之儀
駟馬長鳴無復佳城之記式鑄金石用播蘭荃其詞
曰

英英之秀灼灼其芳家承鍾鼎德潤珪璋女儀閑淑
母範妍詳地宣六氣天廻二光龍孤劍沒鶴寡琴亡
長終帷縞永絕穹蒼餘生可見奄逐徂光薤音悽囀
松路虛涼勒金聲與玉質固地久而天長石刻

大唐故朝請大夫張君墓誌銘

君諱懿字萬壽清河人也昔玉耀南輝抗炎精於翠
鳳金鈎西慶肇昌緒於靈禽或輔翼攀龍創蟾丸於
漢日或飛榮摠秀捧雀環於晉朝父緒隨任汾州戶
曹參軍質秉圭璋心苞松竹堂堂張也未足標其美
懍懍志也秋口詎得比其威釋褐蒙授朝請大夫觀

國觀光筮仕之期纔邁夢楹夢奠止隅之豐已丁先
薨于迅康斯里春秋八十卽以永淳二年癸未二月
己未朔十五日癸酉遷于長安縣隆首鄉之原禮也
五百昌期於斯永謝三千冥契卽此長歸骼瘞幽垆
無復長安之日魂收拱木仍疏京兆之阡嗚呼哀哉
乃爲銘曰

基裘靡墜弁窵聯綿投身送歎寔乃良賢不求祿位
養性邱園月之變改年隨逝川其一口猷水謝玉質無
全誰知積善不復長迅春秋遞往日月旬還令德不
朽歷代流傳其二十二硯齋金石錄

大周朝散大夫上柱國行司府寺東市署令張
府君妻田鴈門縣君墓誌文

錯絡緹緇憑陵縹帙命氏胥庭之表得姓皇軒之初
周漢蔚興曹馬彌盛或封茅土而列子男或剪珪桐
而摠侯伯擊鍾鼎食縱橫於六國之奇動珮鳴珂響
亮於二劉之際衣冠簪紱可略言焉祖德家風則鴈
門縣君也曾祖達隨魏州冠陶縣令懸車捨仕灌園
自樂祖文政唐沛王府大農器局宏壯基宇高深鄉
黨挹其風規縉紳推其道義父什善鄜州三川縣令
廊廟其姿瑚連其質冰潔其清玉潤其白豈止臨淮

朱季吏敬其威蜀郡張堪人歌其惠固可擬儀嵇幹
淮的黃陂鳴弦素翟之馴製錦朱鸞之儼其縣君卽
明堂縣人也交川降德龍嶠誕靈端淑爲姿婉柔成
性聰惠明辯廣讀詩書兼善管絃知音絕代無嫉無
忌惟孝惟貞每以雞曙傳音無不晨而問舅落鴉沉
彩會晚拜以參姑內外所以和安大小咸其無怨論
其婦德實曰成家假若張氏修箴懸知少伴曹家設
誠定足無般何煩苦說三從深陳四德者也頃以儀
鳳之歲出歸張氏一經繾綣十有三年當時洛浦親
迎芝田引駕雙輪轉路五馬連珂燭光將扇月爭明

花影共桃蹊競色冀與南山比壽北極齊年何期積
善無徵禍殃先至雖越人秘術不救將至之魂秦媛
神方甯駐欲歸之魄痛芳桃之墜驗悲翠柳之凋眉
哀隻影而無依歎孤魂而何託春秋卅有三以天授
二年五月十六日薨於萬年縣平康坊之私第嗚呼
哀哉哀子承家等悲纏扣地殆莫能興痛貫柩天杖
而後起一溢之禮不逾酌飲三年之喪情過泣血其
張君遠哂王生違詩不哭近嗤莊氏越禮益歌視明
鏡而傷神對空牀而泣簞以其年六月三日遷窆於
城東龍首原長樂鄉王柴村南一里向南與壽春坊

路通也其地北帶涇渭南望秦原四塞之固名簪安
葬自無殃柩必出公侯于時晝轎東送侍翼排進風
雲隱其郁彩蔽日沉其霞影田歌起頌行路興少爰
之悲楚吹傳聲親戚恨上年之歎恐日月之深遠防
馬驟之荒摧援立斯題紀標刊石其詞曰

家傳烏奕族茂蟬聯安平五里賓客三千朱邸流盼
綠軫鳴絃霜高白雪月上青煙其飛皇啟兆丹鳳來

儀穀城秘府薛縣多奇道義膠柴芳蘭被涯千金白
首一代清規其閨門令淑綺帳流芳昔聞秦晉今是

潘陽聲同琴瑟風度筠篁三星百兩地久天長其鳳

樓絕響鸞匣沉輝桂花夕落薤露朝晞白楊風斷翠
檣煙歸紅顏掩兮龐黑素質秘兮泉扉一朝寂寞萬
古罪微其績語堂碑錄

唐故僕寺廐牧署令蘭君墓誌銘

公諱師字□□南陽人也若夫逸□橫□□□□□
□表高柳之□森梢萬畝之餘韜映今古昭彰史牒
其皆聯暉□素擢穎朝倫□□□克隆華構者卽
蘭君而已矣祖達周車騎將軍鷓□□蛟□稱雉
功超光祿之前名冠將軍之右父樊通□□皇朝相
州參軍局量該□詞條鬱茂竟有聞於悲調何以盡

□瓌材公幼負音節孤標雅譽覽□□於早歲拾青
紫於昌辰萬頃洪波溢黃陂而沃日一枝□榦凌郟
□以騰芳風霜之氣凜然岳瀆之靈斯在爰於弱冠
卽預簪纓□□右署丞又轉僕寺廐牧署令或官連
武庫器寶邦基上下挹其□□□□□腋其忠孝渥川
汗血軼千駟而楊鑿玉塞霜蹄造六閑而服皂屢蒙
□擢□處榮班荷日月之貞暉勵鷹鷂之勁翮□當
享□天秩簡在帝心□元□之遐蹤騁驂騑之逸足
不謂東流淼淼龍門之箭□□西景駸駸烏□之輪
莫□□以永淳元年歲次壬午七月壬辰朔十七日

□□卒於□善里之私第春秋五十有八卽以其年
 八月廿四日權殯于邙山之北原禮也惟君廟堂瑚
 連鼎飴鹽梅信義浹於枌榆□用顯於刀筆遂得炤
 高風而獨運橫邱壑以孤游頻趨魏闕之前載辟□
 宮之地既而冲霄墜翼搏九萬而無因縱海摧鱗擊
 三千而不逮□□笙竽罷奏里閭同悲池臺宛兮未
 平窳窳幽兮已閉嗚呼哀哉□□□崩心聞於厚
 地泣血盡於徂暉懼陵谷之□遷紀聲猷於不朽□
 詞曰

源流湛淡胷緒蟬聯彌綸素謀暉映青編文武不□

□□□□_{一其}奕葉重□忠貞繼踵與朋唯信依仁必

勇並蹈清規□□□□_{二其}悠哉慶緒猗歟哲人風儀

獨秀台問惟新材成杞梓□□□□_{三其}東川永逝西

光遽落萎哲在茲輔仁奚託□□□□□□□□_{四其}

却山舊阜蒿里新塋烟霾拱木日黯佳城九□之上

萬古□名_其刻石

大唐故秦州都督府士曹參軍顏君墓誌銘

君諱瑤字瑤河南洛陽人也其先自隨以上載在史

□皇朝鄭州刺史振之孫□州都督府長史思貞之

子幼不好弄甚有名節以門□解褐右千牛尋以□

□都督府士曹參軍事天容顏子人也其亡以景龍二年二月三日終成□□□卅有二其年四月四日歸□□□州萬年縣四池坊之北一百步焉禮也惟後遷換紀其年月銘曰

日夜不息東□水今□同聲歎顏子□琬題芳無極已刻石

大唐故朝散大夫金州西城縣令息梁君墓誌公諱嘉運字子安定人也溫潤怡儀恭勤令譽隨尊巡翟從父亨鮮騁思文塲遊神學圃不意生災鬪蟻禍及巢鷲積善無徵乃纓沉痼至總章二年歲次庚

午三月乙亥朔廿一日乙酉遘疾終于襄陽縣之私第春秋卅四夫人穎川陳氏隆州長史之女也芳儀春芷質茂寒松六行莫僂四德無爽旣而奔駒易往浮箭不留春秋七十有五以長安四年八月十五日卒於安養縣之私第以景龍三年歲次己酉十月甲申朔二日乙酉合葬於襄州安養縣昇平鄉懷德里之原禮也有恐桑海遷變蓮峯化墳乃崇纂葺遂銘其石詞曰
隱隱遙源坦坦平趾矯矯廬陵含章傑起道有虛盈人非金石秋去墳孤春來草積白日徒照元扉詎關

古誌
石華

唐故魏州昌樂縣令孫君墓誌銘 并序

君諱義普字智周樂安人也受命作周懿親分衛肥
泉自遠瓜瓞攸興儒術箬聞卿有聲於霸楚兵法修
列武流稱於強吳興公之藻思文河安國之屬詞史
筆竝播之謠俗傳諸好事曾祖信魏拜露門博士武
闡訓胄槐市說經玉柄增輝璧池逾濬祖進周晉州
長史魏州刺史題輿與壤露冕雄州譽重沂歌愛深
并竹父乾隋鄆城陳倉二縣令絃桐表逸綰墨凝威
卓令恥其移螟成人媿其冠范君積基三襲騰芳八

桂參立蘊睿辯日飛英涯岸自高波瀾莫究以明經
擢第釋褐魏州昌樂縣令導德齊禮今古攸難君顧
水火以銘懷佩韋絃而取誠疲人有恥曠俗知方子
承景至孝有聞高材絹譽情深色養有懷捧檄上元
之歲從宦河東奉以之官獲申溫清而徂春不駐靖
樹難追粵以二年正月二日終於官舍春秋九十有
三夫人李氏言容箬美琴瑟克諧逝先風露奄同泉
壤君雅道絕倫貞風邁俗潁川英傑許以黃中譙國
俊賢方之白起重以虛舟在己仁心拯物妙達玄言
歸心釋教爰自弱冠泊乎華髮飲食薰辛嗜欲咸遣

每行般舟道常誦法莖經未終之前若有神應恒詠
薛開府詩云昨望巫山峽流淚滿征衣今赴長安道
含笑逐春歸詞氣悽惋左右傷惻自是數日而終嗟
乎知命不憂託文見意君嘗以爲次房交夢近乎懷
土之心卞壺言留幾乎達人之智故趙文子之擇地
楊王孫之不襲其得意哉承景今任雍州高陵縣尉
聿遵先旨改窆京畿卽以文明元年五月廿一日卜
葬於高陵縣之西南樂安鄉之偶原禮也爾其東界
黃河遙臨晉邑西郊黑水近帶秦垌前望終南得夏
公之寶氣却居渭北枕尚父之璜津是知黃壤四隅

白楸三衽延陵魂魄無所不之正也東西焉能不識
嗟厚窆之難曉歎陰溝之永閔託玄石以披文庶清
徽之不墜其詞曰

邠葦載頌淇竹傳詩悠哉長發邈矣丕基卿傳儒雅
武善兵師家承簪紱業茂基茲於鑠通賢惟材之秀
禮義韞鎖人倫領袖環堵業殫金籟學富從政之道
德音以茂製錦非學棼絲易理潘訓自輕游絃知恥
脫屣城邑披襟田里傲睨風雲徘徊林汜夜壑舟徙
悲泉景昃鬪蟻翻聲巢鴛駮翼萬化斯盡九冥誰測
鹽齏清風泠泠不息

十二硯齋
金石錄

袁氏墓誌

夫人袁氏洛州永昌縣□曾祖君岳梁秘書監太子
 □事祖□隨秘書監贈上柱國陽夏縣開□公父大
 業唐海州郟山縣□以聖歷二年十月四日□疾終
 於乾封縣太平里第以聖歷三年正月十五日權□
 於長安縣龍首鄉龍首原石刻

唐故媯州參軍趙府君墓誌

□諱□□字踐冰中山下曲陽人也祖師隨□居不
 仕父潛唐雍州□鄉□長史居約□敏□觀書籍所
 與缺七起家左豹韜衛翊衛選□媯州參軍缺四三

年五月五日卒於媯州□舍春秋卅有九以□景雲

二年歲次庚□正月缺五日癸酉追葬□古曲陽城

北五里缺六府君缺四也嗚呼哀哉□為銘曰

涵缺四字 咒殊靈珠□吐日□□飛星命之不永魂兮

遂冥千秋萬古松柏青青常山貞石志

大唐故右衛中郎將兼右金吾將軍同安郡開

國公鄭府君墓誌銘 并序

粵若稽古周之德也遂宣王母弟俾侯于鄭然後有
 諸侯邦國焉武公父子匡政王室然後有周鄭交質
 焉及其河洛歸民號鄗獻邑羔裘所以潤色鴻業鷄

鳴所以國諷詰訓而後門見蛇鬪鼎嘗龜立陽城入
晉員忝添韓俗泯時移姓因國號自茲以降世弗乏
賢北海儒門縉紳仰其高躅關西驛騎冠冕欽其甲
弟公諱元果滎陽開封人其先祖仕也魏名高當代
功冠朝倫時烏夷弗庭貂戈未戢廼輟爲東光侯鎮
諸滄海于今寰胄尙守其業祖德通隋平州諸軍事
平州刺史脩以文德服以遠人中外咸甯夷夏弗擾
父仁泰少好奇數預識安危屬隋綱弛網諸侯問鼎
人憂塗炭士弗聊生武帝建旗侍鑾輿而吊罪文皇
受禪翊龍飛以底功天下所以削平社稷由其致固

除靈州都督左武衛將軍右武衛大將軍進爵同安
郡開國公食邑二千戶實封二百戶銀書鐵券山河
帶礪卒於涼州都督諡曰襄公起家文德皇后挽郎
解褐曹王府兵曹趙王府法曹優遊磐石之國馳騁
衣冠之地轉函州錄事參軍舊周則新平漆縣綱紀
則提目六曹遷伊州長史代州司馬自西徂北撫邊
鄙以全邦無私徇公佐方岳之半刺未逾旬月除尙
乘奉御閑厰藉其襟帶騏驥資其剪拂遷左率府郎
將乘星夜警趨少海之波瀾候月春宮仰搖山之氣
色除右衛親府郎將右衛翊府中郎將爪牙丹禁鈎

陳紫闥以公恪勤奉職重加朝命仍兼右金吾將軍
襲爵同安郡公委以倉廩留守京師榮深寵厚勲名
將衛霍齊馭道合時來賞契與山河共畢主上深思
侍衛追赴洛陽寄以腹心弗遑靡盬加以劬勞鈴禁
夙夜匪懈無甯晏寢邁以膏肓從此彌留方隨大漸
以大唐垂拱元年六月十九日卒於位春秋六十有
三則天大聖皇后痛心哀悼降使臨祭別勅造靈輿
給傳郵遞送至京宅公與物無競深恩厚仁嚮風慕
義口感行路夫人河南郡君河南元氏後魏景穆皇
帝第九子南安王禎七代孫右衛將軍壽之姪右驍

衛郎將倫之女夫人德潤珪瑾質敷蘭蕙含華方鏡
積昭圓流於是占夢維蛇有巢維鵲作配君子以降
褸狄標梅無虧於三實及桃不爽於九華既下銅雀
之臺還入和鸞之詠雅量溫麗柔姿閑靡彤管符於
稷下清婉合於淹中詩禮抑揚自有椒花之頌箴規
娣姒非無秋菊之銘不以驕奢而遺鼎俎不以富貴
而捐紡績六行克著四德孔脩信可謂儀形邦教丹
青閨訓嗟乎寒泉夕閱風樹晨搖仙草途遐靈香路
邈無復陽臺之雨空餘魏闕之雲春秋五十有三以
大唐永淳元年二月十四日寢疾終於京師龍首里

之弟以開元二年歲次甲寅十二月廿九日與公合葬於承平里之原禮也長子同安郡開國公行闈州晉安縣令口嗣等哀纏殯露痛結號天嗚呼哀哉改卜有典功成身退雄威將壯氣俱銷位達名歸墨綬與丹青弗朽悶佳城而鬱鬱瞻大樹而亭亭刻石泉扃列松塋表播芳猷於萬古垂令譽於千秋其銘曰
欽若宗周分天錫地邑封十號派流千祀其政維何平王卿士其閒維何虢公猜貳虢鄆獻邑周鄭交質詠結緇服符呈丹字互宿恒明芟山弗圯其姓因國立人稱穎靈婚冠之鏡緇紳之衡名高北海價重西

京儒門卷舌豪族吞聲推棘知讓駟毛見迎其睢鳩

有德和鸞有聞粉澤閨戶丹青闔門玉折知美蘭摧

必芬空悲陟岵徒想幽墳其原隰坱軋煙雲悽慘素

駕迴輪蒼山迥瞰松悲月照禽啼夜感白楊蕭蕭傷

心碎膽其續語堂

唐故榮州長史薛府君夫人河東郡君柳墓誌

銘并序

夫人諱口字口河東人也曾祖帶韋周武藏大夫并益二州長史大司會開府儀同三司康城縣開國公諡曰愷祖祚隨司勳主爵水部三司侍郎襲爵康城

縣公孝範皇朝尚書右丞高蔚淄雅發五州刺史楊州大都督府長史或立鑿未□兆道洽於明君列爵成功績光於謚典郎官才授譽烈□臺□熊軾唯□歌芳風俗忠貞永絕贊級相承國史家謀暄聽華□視□人十有四歸于薛氏婦則肅於閨闈親儀光於內外缺實踵前烈當規後來既而劔分榮正鳳別孀居無益母之男有黃公之女悲夫青春速夫素秋馳日神理無柱人生有涯春秋七十有六開元六年四月廿三日終于洛陽縣尊賢里之私第夫人悟法不常曉身方幼苟靈而有識則萬里非艱□且幽而靡

覺則一丘爲阻何必順同穴之信從皎日之言心無□□攸住是非兩失斯則大道何詩禮之□束乎乃遺命鑿龕龍門而葬從釋教也有女故朝散大夫□洛州來庭主簿柳府君夫人攀慕罔極號叩無從虔奉顧命式修厥所以其年八月廿九日自殯遷葬于龍門西山之巖龕順親命禮也嗚呼春秋因襲陵谷推遷刻石爲記爰創銘曰

天道恒運人生必□嗟嗟令淑瀟性虛融永齡靡壽□世歸空北眺丹闕東臨碧嵩生平□兆曠望遐通夜隴□□秋楊□風掩白日而無□期蒼山而共窮

刻石

唐故□□縣開國男行貝州司兵參軍□□府

君墓誌 并序

夫功崇惟志業廣惟勤□□趨班垂衣遺□忠臣奉
國文恩□成前詰克躬藝倫後允傳乎載籍君諱恩
道字勤王京兆涇陽縣人也門承鍾鼎代襲珪璋氏
以國生斑隋地進才華挺出文武秀成攷諧聖謨敷
奏天闕薦文儒則清河吐月僉武士則黃石開符列
史攸存遺編可驗者矣曾祖魏輔國驃騎大將軍西
郡公諡曰恭雄風貫代壯氣凌雲長劔倚天揮戈退

日祖隨胡勝二州刺史皇朝梁州愬管諡曰順襟靈
雅濬志節貞明來蘇遠謠惟良是賴位昇九伯名震
二朝父金紫光祿大夫司馭正卿贈原州都督諡曰
安曠代逸才博文多藝僉能見寵位處列卿帝曰汝
諧星光照隴功成身退歸驂華山始辭九列之榮終
贈一藩之寄公思理清遠心鏡冲虛膺五百之賢臣
仕千年之聖主解褐授綿州參軍親連紫禁譴發丹
墀望國門而斷心瞻岱峯而謝魄自貝州司兵參軍
事如意元年四月廿八日殞於私第春秋五十有四
以開元九年十月十日遷祔于幽州宜祿縣之西原

禮也嗚呼哀哉喆人長謝魂兮遙□□默斯隔靈龜
啟兆仙鶴占墳一代英雄玉顏掩晦方昔令譽金石
流芳元詞曰

望自西涼乘雲帝鄉來朝北極錫□南陽門傳將相
代襲珪璋猗歟宗祖永□無疆其師尹赫赫功業巍
魏根深葉茂泉廣龍歸二朝徵辟□命聯輝百城仰
則千里宣威其二代秩公卿雅譽清英天王□詔駟傳
辭京西戎退境北狄銷兵喆人其逝收馬悲鳴其承
恩紫庭贊治貝城琴前雉雒鏡下鸞□月滿則缺天
道惡盈□逢淪翳終冀康寧其四□河霧斂黃石霞霏

蘭庭掩

缺五

哺鳥群集愁雲

下

石

曹氏譙郡君夫人墓誌銘

并序

夫嚴霜瘁草獨歎蘭摧驚飈拂林偏傷桂折人誰不
死嗟在奄賢伊賢者何譙郡君夫人是也夫人曹氏
諱明照曾祖繼代金河貴族父兄歸化恭惟玉階惟
孝惟忠允文允武夫人柔馨在性婉淑呈姿妙剏組
于閨闈潔蘋繫于沼沚年十有八適左驍衛將軍折
府君為命婦六禮猷備四德凝姿孟氏母儀宗姻酌
其訓曹家婦禮里開指其風豈謂石破山崩奄從傾
逝以開元十一年十月八日終于居德里之私第夫

人春秋不或卽以其年十一月廿三日遷窆于金光坊龍首原之禮也慮樹偃千年人移百代式刊方石乃爲銘曰

天街旣形髦頭有經經緯相汁夫人誕靈如何孤應危露先石逝川之石不返敢平生而著銘石

大唐銀青光祿大夫金滿州都督賀蘭軍大使

沙陁公故夫人金城縣君阿史那氏墓誌銘

夫人姓阿史那氏繼往絕可汗步眞之曾孫竭忠事主可漢驃騎大將軍斛瑟羅之孫十姓可汗右威衛大將軍懷道之長女也自冒頓驕天聲雄朔野呼韓

拜闕禮襲京朝殊寵冠於侯王深誠見乎餘羨夫人天姿淑美雅性幽閑自然貞檢之容暗合蘋蘩之訓年十有七歸于沙陁氏封金城縣君勤于輔佐外彼榮滿藩部所以清謐戎馬所以滋大宜其椒衍盈升保甯榆塞豈謂桂華淪彩已矣蒿歌春秋二十五以開元七年八月二十四日遘疾終于軍舍沙陁府君悲興異室感極如賓雖大夜同歸將鼓盆而自遣而方春搖落詠長簟而纏懷粵以八年三月二十九日遷祔於長安縣居德鄉龍首原先公特府君之塋禮也嗚呼生摯榛栗歿奉松楸霜露之祀忽諸蘭菊之

芳無歇嗚呼哀哉乃為銘曰

李華白兮桃復紅歎零落兮委飄風蘭有秀兮菊有芳
羌淑美兮不可忘閱音容之寂寂侍松檟之蒼蒼
刻石



唐文拾遺卷之六十六

榮祿大夫三品頂戴前分巡廣東高廉道加四級臣陸心源輯

闕名 十四

唐故三十姓可汗貴女賢力毘伽公主雲中郡

夫人阿那氏之墓誌 并序

漠北大國有三十姓可汗愛女建丹賢力毗伽公主
比漢公主焉自入漢封雲中郡夫人父天上得果報
天男突厥聖天骨咄祿默啜大可汗天授奇姿靈降
英德君臨右地九姓畏其神明霸居左衽十二部忻
承美化貴主斯誕天垂織女之星雄渠作配日在牽

牛之野頃屬家國喪亂蕃落分崩委命南奔歸誠北
闕家聲犯法身入宮闈聖渥曲流齒妃嬪之倖女住
天恩載被禮秦晉於家兄家兄卽三十姓天上得毗
伽煞可汗也因承勅澤特許歸親兄右賢王墨特勤
私第兼賜絹帛衣服以充縻用荆枝再合望花萼之
相輝堂棣未花遠風霜之凋墜春秋廿有五以大唐
開元十一年歲次癸亥六月十一日薨于右賢王京
師懷德坊之第以其年十月癸巳朔十日壬寅葬于
長安縣龍首原禮也天漢月消無復粧樓之影星河
婺散空餘錦帳之魂男懷恩兄右賢王手足斯斷雁

行之痛于深膝下長違烏哺之情永絕雖送終之禮
已啟松塋而推改之俗慮爲蕪沒撫貞石以作固鑿
斯文以爲憑度海變可知田移物□其詞曰

倏辭畫閣永臥荒墳人生至此天道宜論日催薤露
風急□門千秋萬古寂寞孤魂石刻

大唐女子唐端墓誌銘

女子字端蓋殿中少監唐昭之第三女也母曰王氏
夫其體脩幽閑門傳禮則克柔其性有婉其容春秋
十有六焉不幸天沒以大唐開元十二年六月廿三
日終於京兆靜安里之第以其月廿六日權殯於萬

年縣義善鄉之原悲歟天乎不臧曾靡降福神道何
昧忽貽其殃諒何有違遂獲此戾悼以長往終天無
期嗚呼哀哉乃爲銘曰

猗歟慶靈兮錫嘉祉婉而從訓兮善可紀宜其享福
兮極遐祀奈何脩齡兮中道止白楊蕭蕭兮隴路悲
丹旆搖搖兮相送歸相送歸兮永別離天情地義兮
長相違

石刻

大唐故騎都尉智君之銘

并序

君諱元字慶其先隴西苗胄智百王之後曾祖隴齊
南陽郡守祖德板授汾州司馬父並溫儒曷志廉讓

兼施守節邱園辭榮不仕君神姿竦遠稟天淑靈帝
施分輝藏光匿耀浮沉閭巷博義寬仁二柄精修時
當用武雄心猛烈召募從征尅敵無遺蒙授騎都尉
豈謂烏災庚日俄飛北斗之魂人夢已年無復南山
之壽遂穆雍家室遜悌鄉閭未旣規模忽離私疾春
秋七十有三開十七年三月十四日卒於私第遂使
愁雲泣烏谿澗吟猿道俗歎其遺蹤內外嗟其舊跡
以開元廿年十一月廿一日葬於夕陽村東北四里
自營禮也東連覆允西眺龍門南瞻象河北臨徐水
哀子懷文號天罔極叩地無追癘切南境悲終陟岵

卽以龍轎去去男申躡躡之悲素旒飛飛女發號咷
之泣其詞曰

青鳥識兆白鶴臨墳梁山歌處遂銘無春

古誌
石華

大唐故冠軍大將軍行右威衛將軍上柱國金

城郡開國公李公墓誌銘 并序

公曰仁德族李氏其先蓋樂浪望族也自堯臣類馬
周史猶龍真裔散於殊方保姓傳於奕代考甲子皇
贈定州別駕天上降成綸之恩地下光題輿之寵公
卽別駕府君之元子也風骨驍奇器用英遠智爲甲
冑義作干戈談王霸則金火生光說甲兵則旗鼓動

色當昔中宗晏駕韋氏亂常將欲毒黎元危宗廟公
於是義形于色憤起于衷發皇明披紫闥奔走電激
左右風趨心冠鷹鷂手刃梟鏡人祇再色帝宇廓清
翊一人以御天功存社稷膺四履而列地封固山河
是用拜公雲麾將軍行右屯衛翊府中郎將金城縣
開國子食邑三百戶晝巡微道環黃屋而竭誠夜拜
殊榮佩紫綬而光寵是用遷公右威衛將軍錫馬承
恩一日三見於天子以爵馭貴十卿同錄於諸侯是
用加公冠軍大將軍進封開國公增食二千戶何居
昊天不憇哲人其萎山岳收神日月奄壽歆以開元廿

卷六十一
四
一年正月廿日葬於醴泉里之私第春秋六十有一
嗚呼哀哉公履謙謙杖翼翼不軒裳而恃不江海而
閑其生也榮其死也慟匪止隣不相巷不歌寔亦負
辰興嗟同盟畢弔特勅贈絹二百匹賻物一百段米
粟一百石供喪事也卽以其年四月十三日葬於高
陽原禮也南面近郊問三龜而一吉東首顧命滅大
樹而小封金玉靡藏誠之智也琴瑟空置奉之仁也
有子二人長曰思敬右驍衛中候次日思讓右驍衛
司階並七日絕漿式五月而葬孺慕凶極賓拜無容
防地道而變盈紀天性於幽隧銘曰

惟嶽降神冠軍當仁忠孝是佩清白爲鄰曷其榮也
社稷貴臣曷其哀也朝市悲人生可續兮孰不萬春
死可贖兮孰不百身生不可續死不可贖歷考古今
誰免風燭人閱代兮代閱人倏兮忽兮一邱塵舟移
壑兮壑移舟蕭兮索兮九原秋意氣盡兮萬事罷泉
門閉兮九重幽悲夫悲夫空默默魂兮魂兮何悠悠
續語堂
碑錄

大唐大安國寺故大德惠隱禪師塔銘 并序

禪師俗姓榮京兆人其家第四女也族望北平曾祖
權隨金紫光祿大夫散騎常侍兵部尙書東阿郡開

國公祖建緒銀青光祿大夫使持節息始洪諸軍事
三州刺史東阿郡開國公叔祖思九黃門侍郎父懷
州夷州綏陽縣令外祖韋氏字孝基皇中書舍人道
遙公之孫也禪師聰識內敏幼挺奇操粵自髫鬣敬
慕道門專志誦經七百餘紙業行精著簡練出家自
削髮染衣安心佛道尋求法要歷奉諸師如說脩行
曾無懈倦捐軀委命不以爲難戒行無虧冰霜比潔
或斷穀服氣宴坐禪忘或鍊臂試心以堅其志動靜
語默恒在定中凡所施爲不輟持誦雖居有漏密契
無爲雅韻孤標高風獨遠嗚呼驚波不息隙影難留

生滅無恒遽隨遷謝以開元二十二年七月十一日
壽終於安國道場春秋七十有六右脇而臥奄然滅
度臨涅盤時遺曰吾緣師僧父母並在龍門可安吾
於彼處與尊者同一山也弟子尼博通三藏才行清
高生事竭仁孝之心禮葬盡精誠之志追痛永遠建
塔茲山縱陵谷有遷庶遺芳不朽乃爲銘曰
至道希夷代罕能窺探秘就妙夫惟我師其一爰自齟
年訖于晚歲精念護攝虔誠不替肅肅戒行明明定
惠淨業滋薰與佛同契其二逝川不駐隙駟難留奄隨
運往萬古千秋嗟永感而無極式彫紀於芳猷其三

以乾封二年明經高第授文林郎非其好也解巾從
職雖陪南宮之禮挂冠辭榮遽躡東都之迹烟霞入
賞琴酒摠情談老莊而卒歲詠圖書而盡日以垂拱
二年三月廿日寢疾終於景行里之第焉春秋六十
有二惟君素履貞慶黃中元吉果行育德資孝惟忠
出入於仁義之間周旋於名利之外優遊天爵方膺
五百之期寂寞泉扃奄見三千之日嗚呼哀哉以其
年歲次景戊四月庚午朔四日癸酉窆於河南縣平
樂鄉之原禮也有子懷素等樂棘毀兒茶蓼居心痛
遺澤之仍留仰遠期之有日攀松攬栢孺慕何階地

久天長聲芳未已其詞曰

白蜺仙術青鸞政道誠感天地功侔造化造靈根仙胄
弈代重規衣冠閎闓人物英奇猗與宰邑或善毗贊
鬱彼襄陽高情燦爛宏材特邁偉量孤凝千尋木聳
萬頃川澄沈研載籍脫缺二字侯東都美遂南澗良游
福善無冀與德何乖泉臺忽掩玉樹長埋石刻

宜祿府折衝都尉君墓誌

赫赫宗□□天下分族命氏列乎于成公缺連曾
祖威皇祖中大夫禮部侍郎祖立缺散大夫趙郡慶
陶縣令父崇侃□□朝議郎缺戶參軍於是克清門
風乃敷政理備歷中外缺以良家子屬中宗孝和
皇帝有事郊缺為□□授左羽林軍長史轉京兆
府望苑府別將左清道率府□□候當警夜紫禁環
衛丹墀以事一人方逾一祀無□□調河東郡霍山
府左果毅都尉左金吾衛知隊仗□□交郡龍交府彭

原郡天固府加振威副尉新平郡宜祿府左折衝都
尉知隊仗如故兼左藏庫使勒驍雄之勇列虎兕之
師守金帛之殷將出納之恠公幼而習武長而主兵
□默其心堅白其操或善之□矣豈禍之遙矣邁疾
彌旬□于咸陽別業然天寶五載九月廿一日享壽
五十有五六載十月廿八日葬於長安高陽原禮也
銘曰
吁嗟都尉三居其□天階入侍天府司使福善□□
遙□至且小□松柏乃高起襲塹非獨今日之如然
皆當萬古之所□石刻

大唐故西河郡平遙縣尉王府君墓誌 并序

原夫愨於蘭谷者猶聞十步之芳陟於松巖者尙覩
 千尋之榦况乃于門□族□□名家堂構挺生不□
 不□者矣公諱□字□□河南河內人也太原望族
 徙居河內焉曾祖元隨任遂州司馬□□□皇朝□
 太子家令贈少府監並以睦□登榮□翰昇貴父□
 字任太子中舍人贈銀青光祿大夫至於承親孝親
 割股仁缺七字缺六之節沐旌表門閭之恩制越古□□降
 褒揚道缺六字缺六於□代並□編於史謀此可略而言焉
 公以積善資靈深仁缺六字缺六之性早登儒策之科釋巾任

宣城郡宣城縣主簿江□澆□□□難抑公以清平
 作範正直申規□得吏愛毗謠傳芳播譽缺八字缺八家之
 子富筆之才擢授西河郡平遙縣尉汾州巨邑晉野
 雄邦地稱閭井之繁人恣田□之訟公以襟靈若湛
 筆翰如流疏江□以□源與奮□而共理自六曹經
 □□考在公閭閻無謗譁之聲□□有□揚之美缺八字缺八
 觸□懷戀德之情□吏結去思之想故□千里駕
 轅轡而已迎勁缺五字缺五庭而畢□昆房喜躍廣□善以
 同居隣伍歡愉仰仁德而垂蔭方□廣修淨業□繼
 先風何期福善無徵殲良奄泊以天寶九載二月九

日遘疾終于河南府河陽縣韓城鄉之本第春秋五

十有六以其年三月十四日安厝于河清縣親仁鄉

耐先祖之塋禮也惟公□德無方嗣徽名以植操□

深仁缺七之儀清高節儉表其□風神缺四體斯乃

自天攸為嗟缺五縱非乎激浪沉鱗翔空墜羽□□

將駕蒿隧已開缺十之永隔悲舉案之長乖有子三

人缺四郎次缺五為銘曰

惟彼善門誕生材子稱奇初歲缺五高缺四人□唯

□是言惟仁是居宣城授□汾邑昇榮□察□濫剖

斷缺八仁□□□流美遺愛馳聲反轡邱園安神靜

謚閑缺十幼筭滿室庶憑積善永固休逸福行曾元

字缺四荆華□□棣萼旋凋佳城已啟德誌虔標修陵

有變夜壑長昭孟縣志

唐故定遠將軍守左武衛將軍員外置同正員

上柱國內長入供奉張府君墓誌并序

公諱毗羅其先清河人也父諱毗羅奕葉承家隱輪

不仕公累襲冲和之氣克遵高上之風芝蘭入室瑾

瑜照廉其事親也色難以養之其行異端智周以成

之由是蕭灑正園恬澹霞月優遊朝有不違大隱之

趣弋釣林泉有光豪士之迹夫然者宜其夫奏天階

拜儀帝坐公家其寵命遂拜定遠將軍守左武衛將軍以天寶十四載八月廿七日薨于金城里之私第春秋七十而以其載十一月十七日葬于承平鄉原之禮也長子咸哀泣血威席冢孟常泣感於大風賢陵卦劍於心許乃爲銘曰

府君反葬升成西吉兆地夏明金雞千秋萬歲兮松栢齊魂魄歸兮長不迷

石刻

唐故銀青光祿大夫行內侍員外置同正員上

柱國張公夫人鴈門郡夫人令狐氏墓誌銘

并序

惟天寶十有二載十一月四日夫人卒於京兆府殖業里之私第嗚呼時載六十有三夫人之姓裔自乎大原處嬪于室凡廿載矣夫人進對工繡以備於賓祭□□先祖恭具於膏澤正之以容貌不以悅已怡色事上撫下允穆謙和愛子如生育人無怨夫張公諱元忠任大中大夫賜邑爲鴈門郡君後進銀青光祿大夫遂加號鴈門郡夫人也不意因由運改福謝緣疎夫去天寶九載五月十三日卒於河南府里之第宅次載就葬于京兆府三原縣之分界自阻已後念趣來緣每弘慈悲常思不忘以夫先偶同事幽泉

又歲月無良遂別塋壤眾子未宦莫能再榮嗚呼人道所悲傷矣以今載十二月四日遷殯於京兆省長安縣龍首之鄉原也代移世久墳壠摧殘刻石爲銘媿序夫人之德銘曰

食邑之家捨於珠珥簪纓之族衣無重綵六行所備四德兼載謹慎閨門善音無壞太山南指渭水東邁歲月蒼蒼記之永代石刻

唐故將士郎守邠州潯川府長史焦公墓誌并序公諱瓘字潤河內廣平人也蓋夏殷之後古者建德立功因生賜姓宗氏以茲而起枝派自此而起暨夫

温玉神口蘭

缺四字

楊威於漢魏之代或宣布於齊梁

之間其後口之口雖百代可知也隨季崩淪天下喪亂高祖以義旗輪轉元從長安因官平涼遂爲邠土曾祖仁皇職資陪尉祖貞皇勲官上護軍並積行累德修辭立誠名播於閭閻之間聲聞於郡邑之內父庄克勤於家克儉於國不失色於人而人敬之不失口於人而人信之故得聲聞府縣譽動軍州公幼而聰敏詩禮以得於趨庭長而強學奧義更聞函杖志學之年旋霑一命之職弱冠之歲望遷五守之官何岳福慶外移不保南山之壽災纏內豎奄歸東岱之

魂以寶應元年十二月十二日遭疾卒于私家春秋
廿歎苗而之有季痛秀而之無成妻子類崩父母傷
割骨之痛今口遠有期龜筮習吉遂以唐寶應元年
歲次壬寅十二月景午朔廿七日庚辛殯于邠州三
水縣歸義鄉邠邑原禮也父疰悲傷五內哀感四隣
但恐田成碧液水變倉山故勒石留文以旌丹誌云爾
於穆遠衰肇自周秦惟祖惟孝乃武乃文念子
聰敏幼年立身不幸短命福降沉淪嚴父切骨慈母
割恩哀哀戀念泣對孤墳

石刻

唐故畢府君墓誌

并序

公諱遊江平陽王彥之後也世居太原豪族弟一英
材侷儻智謀深遠謙約節儉廉慎有規於家以孝有
曾閔之心事君以忠曉縱橫之略寬而能猛猛而能
寬接朋友盡盛德之儀理室家剛柔得中有仁人焉
有社稷焉賢妻在室遙鑒於山濤命子理家更崇於
幹蠱公周之宗盟也繼世在茲王侯之種遊宦不遂
蓬轉於茲降志辱身隱於城市苟得甘脆以奉慈親
日居月諸卅餘載公之太夫人以貞元十三年七月
六日傾背公禮制不虧大事終竟奉親也生事之以
禮死葬之以禮祭之以禮可謂孝道全矣公有子二

人長曰宗茂次日元清並有令聞皆公之有典有則也將以積善之人保受其福豈爲降年未永罹此禍殃以貞元十九年六月十四日壽終於恒府敬愛坊之私第也時年將耳順深可哀哉里巷不歌鄉鄰歎息則以其年七月一日歸葬於府城西北七里冰河鄉之原也傾城出祖縞素盈途送葬者執紼而行赴弔者隨柩而哭白馬前引顧步而悲鳴啼鳥以臨向風而慘惻恐陵谷屢遷紀茲貞石用招不朽聊述德音詞曰

樂只君子邦家之光日來月往身歿名彰松風切切

野霧蒼蒼昔作人中之寶今歸泉下之鄉石刻

唐故石府君墓誌銘 并序

府君曰忠政字不邪生于京兆府萬年縣人也邑崇仁里清閑不仕自居其家昏何氏不幸元和二年四月逝葬城西小口村府君壽年八十有二終于長口二年七月十日以其年八月二十二日口葬于小口村長子義後亡亦葬於此後口口口年當家約缺四字義鄉南姚口口掃灑莊一所遂再啟舉遷厝莊東南口十步已來遂擇吉晨以其年八月九日口祔翁婆及兄義並安于墳闕乃命口口存之不朽銘曰

八月□□風悲切安厝先靈歸墳闕□□孝感理於
天萬代子孫昌不歇石刻

大唐故成德軍節度下左金吾衛大將軍試殿

中監石府君墓誌銘

并序

府君諱神福字忠良金谷郡人也曾祖試鴻臚少卿
□用祖授左翊府中郎將臣恩父何羅燭試雲麾將
軍蔚州衙前大總管有子四人公則第二子也生於
雄武長在蔚州□歲從師弱冠好武事親唯孝訓弟
唯和五郡欽仁六親談美遇安史作亂飄泊至恒陽
尊父早亡哀榮葬畢及乎攻武使得穿楊君主亦知

收於戎伍頻經戰伐累效壇場勇毅前衝殺戮無數
敘功見錄八座親命俯臨悅暢君心遷授大將爲征
馬事重委在腹心兼令勾當右廂草馬使事何天不
祐忽染沈瘵針藥無效去元和八年正月十七日奄
然大謝於野牧時春秋五十有五男乃泣血女孝絕
漿號天叩地親戚悲悼去二月乙酉朔十八缺石邑
縣東北一十里□兆而厝也恐缺石紀芳用傳不朽
其詞曰

英雄將軍武藝超群頻經鬪敵殺戮前奔收功見錄
獨授崇勳紀名貞石不朽于春

常山貞石志

其地曰
 其地曰
 其地曰
 其地曰
 其地曰
 其地曰
 其地曰
 其地曰
 其地曰
 其地曰

唐京兆季愛子墓志

唐興元初仲春中巳日吾季愛子築役于廬陵殞於西壘之顛吾時自王文昭政命令晦朔康定之始未欲於宅山就瘞於西壘之垠吾卜茲土後當火德五九之間世衰道是浙梁相繼喪亂之時章貢康昌之日復工是壘吾亦復出是邦東平鳩工復使吾愛子之骨得同河伯聽命于水府矣京兆逸翁深浦記

記

唐故東海徐府君夫人彭城劉氏合祔銘

并序

大和八年歲次甲寅四月廿一日徐府君終於揚州

江陽縣瑞芝里第春秋八十有四越來年乙卯歲
十月廿八日合祔于楊子縣曲江鄉五乍村先歿夫
人故塋禮也府君諱及其先東海郡焉曾祖環婚李
氏祖明婚王氏考璟婚朱氏而生府君婚劉氏而生
五男二女諫暈二子存歿莫知早列前銘禮無再述
其存曰震高上不仕次曰砥殿中省掌御服七色主
衣次詠宣節校尉前守左衛翊壹府翊行常州蘭山
戍主一女適劉氏不幸早廿星霜數秋一女適呂氏
早孀于家三從並絕府君忠孝二備仁信兩全門風
肅清訓子以道夫顯於身者德也顯甘者壽也誥誥

子孫弓裘不墜府君三絕矣古之葬者無銘誌而自
魏時繆襲乃施之嗣子習古之規敢不修撰不捨此
事稱家有無而命余琢他山之石慮虞陵谷直書其
實乃爲銘曰

穀則異室兮死也同穴府君夫人兮于茲永訣刊石
于墓兮克荷前烈嗣子哀哀兮攀號泣血寒郊蒼茫
兮悲風切切萬古千秋兮孤墳弔月石刻

卷之六十七
三十一



唐文拾遺卷之六十七

榮祿大夫三品頂戴前分巡廣東高廉道加四級臣陸心源輯

闕名 十五

唐舒論墓誌銘

論貫杭州鹽官縣靈泉鄉望出天水郡公諱敦父平
論是平第二子時年廿有四以元和九年甲午歲十
月十四日終于天長鄉內私舍以其月卅日葬於當
縣西南四里買裘氏地安厝之禮也論未婚父平并
兄弟等恐陵谷變遷桑田改移勒為誌詞曰
青青松柏落落澗石蓬蒿里中長斂魂魄口閉泉門

千秋永隔 海昌備志

海昌縣志卷之六十一

海昌縣志卷之六十一

海昌縣志卷之六十一

海昌縣志卷之六十一

海昌縣志卷之六十一

海昌縣志卷之六十一

海昌縣志卷之六十一

海昌縣志卷之六十一

海昌縣志卷之六十一

唐故國子律學直講仇君墓誌銘 并序

君諱道朗平陵人也門傳鼎鼎世襲簪衮享茅土於東齊光印綬於西漢曾祖周任驃騎大將軍簡州刺史蘊龍韜之秘略勇冠三軍當虎符之重寄化行千里祖絢隋任車騎將軍鷹揚即將材力過人雄傑槃世父詵唐任相國執散大夫攀鱗附翼鳴珮鏘金君道稟自然智由天縱幼彰令問資孝友以基身長習文儒體仁義而成性珠明玉潤桂馥蘭芳兼以才辨有聞功能克劭拜騎都尉既而志識甄明學藝該博亦婆娑於禮則復優游于憲典迺授宣德郎行國子監

律學直講雖環林璧水弘其待扣之材方領圓冠承
茲鼓篋之致實以君道泰身否德尊位卑於是飛鴻
繳翮靈聞漸陸之誼不謂棲鷲斂羽俄歎沈舟之酷
以咸亨三年五月二日春秋五十有四終於京兆私
第嗚呼幾傷埋玉更軫摧蘭雖振青徽於萬業而戢
形骸於一棺嗣子元暎通直郎幽州三水縣主簿上
柱國悲深陟岵孝著循陔啓楹書而切慕瞻手澤而
增哀夫人隋太常寺太醫令黃鶴之女也以萬歲通
元率五月廿六日合葬口京兆南高陽之原禮也隧
路浮煙泉門少日嗟蒿里之宦眇聽松風之蕭瑟嗚

呼寸晷難常尺波易往勒芳猷於玄石銘愨勤于黃
壤其銘曰

歲時不待□□□謝倏矣浮生悲哉厚夜松檟森森
泉臺窅窅百身莫贖千秋詎曉石

唐故承務郎試左武衛兵曹參軍攝無極縣令
天水趙公墓志銘 并序

公諱全泰字全泰常山郡真定人也考諱融易定節
度參謀□度營田副使朝請大夫檢校尚書兵部郎
中兼御史中丞賜紫金魚袋上柱國公至學之歲曾

讀詩書冠帶之年留好文藝起家攝定州無極縣主簿再爲府掾五宰屬城事有始吉而終凶有前中而後否衣舟疏網限至難逃歿世之年五十有四時則大和四年十二月廿九日夫人隴西李氏宗正卿亳州刺史瀚之孫都水監丞穎王府參軍陝州夏縣丞邁之女晝哭毀聞有子二人長曰存序幼曰存成有女二人在室摧慕過禮以大和五年正月廿七日遷窆於州城西北七里翟村平原禮也貞而可久刻石銘之銘曰

奔曦轉側半西沈顧影知爲長逝心悲風撼撼吹原

野荆棘籠墳荒草深

常山貞石志

唐處士陸君墓志銘

處士諱曇字文廣其先吳郡人也祖諱光父諱朋處士幼承嚴訓長有令望風義洋洋遠近欽矚經學至美筆法尤精不仕明時邱園樂道禍不讓善殲於哲人以開成元年寢疾至二年丁巳歲暮春之月四日終於私第春秋五十有二以茲年孟夏月廿一日終安厝於華亭縣南廿五里村號茆塔以平原新塋禮也處士娶吳氏生四子長曰行肅次顧師次杜老次稜婆悉以童稚之年而知孝弟恐時移代變林隴彫

摧刻石刊甄永為不朽銘曰

浮生寄世電影難留嗚呼良士埋沒荒邱魂氣兮歸

天形體兮歸墓親戚兮悲傷兒女兮號訴

松江府志

唐故陳府君墓誌銘

府君諱環潁川人也祖興父道清並不求宦達君即清公之第二子也幼著才識長閑規矩克言理行鄉閭所欽何圖天不佑善以會昌二年正月二十一日終於私第享年六十有三以當年八月十八日窆於蘇州海鹽縣東二十八里齊景鄉雅山南二里祖墳南舊塋禮也君娶吳郡顧氏有子三人長曰遂次曰

師損三曰公甫並至謙至讓忠乎孝乎泣血主喪絕漿逾制後恐月日久邁陵谷遷移刊石為誌永傳不朽銘曰

山作田兮田作海萬古存兮誰不改青松新隴曉無年千載惟留銘記在

嘉興府志

按此文據嘉興府志補缺文四十餘字

唐故陸氏廬江郡何夫人墓誌銘 并序

大唐會昌五年乙丑歲孟夏之月廿一日夫人終於家春秋六十有八祖諱眞父諱口口其先廬江人也夫人幼習女儀長有令譽初笄之歲匹于陸君肅肅

雍雍如琴如瑟嗚呼不同借老陸君不幸而先逝夫
人所生一子元慶幼而習禮頗識義方承順慈顏曾
無怠色水漿不入杖立營葬以所卒之年莫秋之月
乙巳朔廿六日庚午遷奉於華亭縣西北二十三里
陸氏故山缺五夫之兆以遵生前之命今慮歲月緜
邈林摧隴隳刊碑立銘周表系以銘曰

嗚呼浮生如露如電平生玉容無由再見精魄散
形體缺四慕鄉親子淚雨石

米氏女墓誌銘

米氏九娘其先蓋□□□郡人也父諱寧米氏即公

之室女貞淑温□□家孝行幼女聰明缺六和睦□

內外親族無不欽傳愛敬立身閨室令則高門□禮
於家孝行無比何期不幸邁疾即以會昌六年□月
五日終于揚州江陽縣布政里之□享年廿有一嗚
呼長及笄年未娉待字從兄親弟泣血哀號六親悲
切行過傷嗟即以當月十九日殯于城東弦歌坊之
平原禮也恐陵谷遷故刻貞石不朽焉銘曰

白日昭昭青松森森生死有限□明恨深朱顏永□

萬古傳今十二峴齋

唐故劉府君墓誌 并序

府君名舉彭城人也曾祖皋祖通父良三代並皆謂
居清顯隱于丘陵府君承家禮讓立性溫和內外之
親皆傳人孝充於四海朋友能賢何期不幸染疾累
歲至於大中元年八月六日歿于江陽縣仁風坊之
私第春秋□□夫人太原王氏有男一人名師貞女
一人適于王君孤男孝女泣血號天卽以八月廿一
日妥□嘉寧鄉五乍村之原府君在生壽祿兩榮先
造其墓逝矣寘下石

唐故右內率府兵曹參軍朱府君夫人南陽樊

氏誌銘 并序

序曰南陽之後軒冕閒世最爲國內所稱曾祖釗皇
明經出身泗州連水縣令夫人連水嫡女有兄一人
早逝唯獨孑立未登笄歲歸於吳郡朱氏二紀輔佐
不幸居孀志在鞠育悉知禮義皇天不祐大中四年
七月廿日薨建業鍾浦之舊第春秋八十有一以其
年歲次庚午十月乙巳朔十日甲寅合祔兵曹於鍾
山之南善□里原禮也夫人遺息二人女二人長圓
郎將仕郎前守淄州□水平縣尉次散郎拔眾敏利
迴戰史□□曰先仰廿一娘適□□衛兵曹參軍瓊
邪王鑑廿二娘適前太常寺奉禮郎潁川陳□嗣子

等泣血號叩感而爲銘勒于貞石行焉銘曰

煒煒煌煌洎漢貽唐磊落軒冕連綿琳瑯令則和睦
于何居孀提挈撫育歷饑經荒馮以積慶福壽無疆
天不惠垂玉潤迴藏金爐歇艷寶鏡休光嗣子泣血
孝女絕漿卜吉遷窆鐘領之陽楨柏森森永剋嘉祥

古刻
叢鈔

前長安縣尉楊籌女母王氏墓誌

王氏小字嬌嬌長號卿雲汴州開封人幼失怙恃鞠
於二女兒之手長女兒以善音律歸于故相國盧公
鈞卿因女兒遂習歌舞藝頗得出藍之妙宏農人初

以音律知遂用綵問於女兒唐咸通庚辰歲子月遂
歸于楊氏未幾楊子以罪逆受天罰待死于長安萬
年裔村曰庫谷王氏固非宜留將歸女兒堅不去願
同疚于荒墅太夫人念其孝謹因許之寒暑三周備
嘗荼蓼奉上和眾端貞柔淑在楊氏五年束如一日
楊氏德其孝謹遂忘前所謂出藍之妙方思微霑俸
祿且酬其勞不幸以甲申歲午月邁時癘疰且病鑿
餌有所妨故反豎得以成禍以其月四日誕一子子
踰臘而終銘曰

父王母高兮作媵于楊始以音知兮終以行彰其家

千指兮劔戟鋒鏖處于其間兮卒無短長善非爲善
兮天受其臧心雖猶面兮茶藜備嘗衣不暖體兮食
不充腸歲月遲遲兮五周星霜人不堪憂兮卿不改
康宜有豐報兮白首相將如何天奪兮二九其芳風
露猶清兮日月猶光蘭薰玉潔兮不可弭忘

古誌
石華

唐故□川于府君墓志銘

感君子之風履古人之道懷仁義以安禮樂立名節
以善其始終者則有武原于府君焉君諱陽字予美
曾祖副祖對父誼或潔身於高士或顯志於明時府
君卽誼之第二子也幼敦孝弟長睦歸仁清聲旣高

求閒林圃何啻靈芝見萎醴泉咸竭以咸通五年甲
申歲五月十五日遘疾終於私第以六年乙酉二月
二十日窆於縣西南卅里尙父鄉修化里通元寺西
新塋禮也夫人太原孫氏承奉祭祀有女三人嗣子
一人曰□行以仁孝親鄉黨以忠厚□□邦泣血增
哀哀有餘禮女三人皆適名族□恐年逾代遠地谷
遷移茹毒銜悲請爲□誌其銘曰

□□西□武原之域□葬其中以流其福□□□□

卿木朝肅將書永年日明胤育

常山貞
石志

唐故湯府君墓誌銘

并序

君諱智其先范陽人也父湛湛之幼子也春秋六十有四咸通六年十二月十二日亡以七年三月八日葬吳縣胥臺鄉先買顧涓桑宅地□□顧弘朱從等建塋禮也有子二人長師藏次從□女一人正劉氏恐後無憑刊塋于□其銘曰

嗟乎湯君俄隨風燭一閉佳城千秋陵谷石刻

唐梅□□墓誌銘

梅氏之地望在汝南府君之世業居海昌祖諱羅父諱慶皆遨遊時世遁跡邱園府君慶嗣子也未及弱冠泣澁職遞歷眾局至於首統諸曹遊刃其間自後

頓懷高尚杳思退休□□千家倏遷十稔乃迫知己

薦□赭山未越月而政聞差劾浙東鹽盜不踰年而

盜伏法自是奸人懼反訟於公公自夏初雪濫一本作檻

於越會廉察滎陽公鑒其冤尋與申白一本作聞上命未

回而公邁疾奄然長逝春秋五十有四娶廬江何氏

夫人君無賢嗣有女一纔及笄以咸通□年十二月

廿五日歸窆於鹽官縣之昌亭鄉新建塋禮也爰勒

貞珉求其不朽銘曰

□之□兮必摧玉之堅兮必缺魂之往兮不回□之

逝兮永訣□之□兮□□隙之光兮電掣歎兮悼兮

泉局是口

海昌備志

孫夫人墓志

唐咸通元年閏拾月拾伍日富春郡孫夫人從夫王氏之任潮州程鄉縣令時夫人遘疾歿于官舍享年四十七歲卜兆未利權設殯筵泊叁年歲次壬午玖月拾捌日啟葬於廣州南海縣四望亭後崑慮陵谷變遷刻石紀爾

石刻

唐故河中府左果毅都尉高府君墓誌

君諱思温字知柔渤海郡人也曾祖筠試大常協律郎祖舉司農寺丞父建謀左清道率府兵曹參軍君

娶夫人范氏不幸早歸大夜君以軋符三年四月十一日終雅俗坊以其年五月六日葬于江都縣興寧鄉趙墅里之原禮也享年四十七恐陵谷改移直書銘曰

哲仁君子忠孝於國家和六親有文有德直書其名以傳他日長歸蒿里萬古千口

石刻

唐貞士韋君墓志

於虞此有唐貞士韋君栖真之所也貞士諱士逸字士逸萬年杜陵人也舉進士釋褐為赤縣尉不屑焉遂弃去躬耕南山家室睦如入其庭知其為隱君子

韋爲京兆望姓祭冠累葉貞士獨澹如也不以門第相競於事其謝傅之流亞歟中和四年七月貞士拚微疾喟然曰出不負乎君而死不違乎親生無裨于時而死不見譏于人其亦可矣以其月寢疾沒越三月葬于山中之白鹿坪以其配杜氏祔禮也於虜貞士往矣而貞士又無息千百年後陵谷迭石誰復知韋氏之有貞士乎爰略生平置諸墓門以誌貞士云

梁故東海徐氏夫人墓誌銘

夫人卽節度右押衙鎮東軍副知客銀青光祿大夫

檢校國子祭酒左千牛衛將軍兼御史大夫樂君之冢婦也夫人曾祖諱□祖諱佐□嚴父皞見充鎮東軍觀察孔目官檢校工部尙書夫人以乾化四年七月六日遭疾奄逝享年四十以其年八月三日歸葬於鄞縣靈巖鄉金泉里禮也噫乎夫人稟媽然之姿態實仙苑之桃李自和鳴鸞鳳竝顯令德而又柔順孝敬以奉姑嫜爲六親庭闈之則所謂神垂其祐天懋其喜孰知一旦遽罹凶□歸於窀穸夫人育一男光途年猶幼冲悲乎偏露所不忍睹嗚呼生也幻世沒兮歸人聊配馨香用標年祀銘曰

君之容止悉皆推先君之行義不辱移天蘭旣摧而
玉折日將遠兮時遷永刊貞□千年萬年鎮海縣志

大唐故府君墓誌銘

維大周顯德元年歲次甲寅十二月辛丑朔二十日
庚申懷州武德縣缺州清河缺君諱缺供奉缺巡檢
使缺新婦劉氏新婦石氏嗣子長缺次男缺次姪永
興長男新婦李氏次男新婦□氏長女□□次女
□□孫女子□姑次孫女子不憐次孫姪兒不秋缺
曾聞壽涯修短稟靈臺而□□其分缺千歲為遙齡
郡路一□夫□為促世蓋一至缺彭成郡劉氏夫人

忽□□席救療無詮何期不缺知身如缺它後難缺

置墓缺南二里東南黃蘆缺射犬古城約三里缺河

口二里其塋地一□東至□□南至賈□西至□□

北至缺父業地缺妙尅缺龍虎缺子孫缺石缺刻

王夫人墓誌銘 并序

缺氏吳郡人也稟質貞缺三從有義四德無虧缺

字三忽邁彌留日役纏缺正月八日終于缺五歲

次庚戌二月廿七缺西北七里武邱山缺二人

長子珣次子缺恐陵谷變缺古誌缺石華

大唐故冠軍大將軍代州都督上柱國許洛仁

妻襄邑縣君宋氏夫人墓誌 并序
夫人諱善主字令儀定州安喜人也原夫玄禽翹羽
□有商之祚白翰騰驤肇承殷之祀洎乎分邦錫祉
□茂實於睢陽列國會盟秀芳華於官度祖逸周開
府儀同三司江州刺史永甯縣開國公父濤隨左千
牛備身永州長史柱國襲爵如故並位光烈宰名參
上將塞帷楚甸副軫衡吳夫人名藹蘭閨聲絲闕壺
標梅靚止檠木承恩捧案申恭敬深饁野年過蒲柳
歲迫桑榆邁疾彌流遊魂岱錄春秋九十有九薨於
金城坊里第卽以其年五月廿四日窆於龍首原禮

也嗚呼哀哉松風悽慘薤露蒼茫悲夜臺之永暮痛
佳城之未光乃爲銘曰

天開寶祚地啟靈源瑤華蔭蔚玉葉便繁偉哉先哲

猗□後昆褰帷下邑露冕上藩其一四德標舉三從惠

養淑慎居貞聲名厲響□景西傾逝川東往瘞玉質

口重泉遂埋魂于幽壤其二十二硯齋金石錄

毛藻墓誌銘

顓頊開源皋陶構緒門多俊傑代有文武萇卽演詩
遂使威芘雲布簪猷星羅台輔偃蹇疏放志在追遊
旣輕軒冕不重王侯夷齊作侶嵇阮爲儔滿堂嘲謔

孟罇獻酬一生易盡百年難駐奄逐夜風俄隨朝露
行旅傷感親友追慕隧道已通佳城將措黃泉路遠
白馬悲深日慘春暖雲結郊陰草懸露泣樹引風吟
式鑄貞珍永播芳音

廣平府志

唐故上騎都尉通直郎行永康令杜府君夫人

朱氏墓誌銘 并序

若夫桂曄松貞表恭姜之逸操蘭薰雪白彰孟光之
閑雅寢地之訓無爽於幼年弄磚之儀有成於廿歲
能兼之者實夫人之謂乎夫人朱氏卽榮之後也分
官命族唐典邁於知人楊歷開基魏史光於進德父

琛才兼文武位列周行冀燮鹽梅將調鼎鼐夫人問
名納禮適於杜氏之門承舅姑以敬恭事娣姒而柔
順中饋酒食之禮罄悅榛栗之儀皆闡合於前經終
可爲於後則不謂歲舟靡固陽劔先沈志負寒霜撫
其孤藐每心歸向祈以淨因虔仰六時匪虧一念知
岸樹之非久識井籐之不堅豈積善之無徵忽遷神
於大暮於是夜臺空掩遊月肆而無歸草露晨晞望
雲衢而不返春秋七十有八嗣子君信泉樹多感樂
棘有傷思答無由號天叩地卽以其年十一月廿五
日葬於龍首原禮也白揚淒切素柳縈紛月旒繽翔

黃壚靜寂恐陵移海變冥漠無追敢勒翠琰式旌不朽銘曰

萊梁之妻夫人能似幼令德實佐君子家襲冠紱名傳策史俄化一生溘焉萬祀其容駕晨裝哀歌曉徹庭酌告辭崩心歷血口口懷楚見之嗚咽恐音徽之寂寥庶揚芳於鏤碣石刻

唐王五從高叔祖易定等州缺上柱國李公故

夫人遼東榮下缺墓志

夫人諱尚卿其先遼東人下缺口口后妃之賢者故

慎氏下缺口口名振於義武軍三代下缺口口柔和立

性婉順深有靜下缺口口尚容德也自作嬪君下缺

口口玉葉秀而芳陰多下缺口口親禮樂之風

訓習下缺口口之祿華如桃李下缺口口近無

出其二美焉下缺口口而虧隨彼倉下缺口口亟

九日終於定州博陵下缺口口習禮次日師周承天

鳳而下缺口口聞詩禮積習義下缺口口不自勝歎鳴

婦之道聿修承下缺口口安喜縣鮮虞鄉暉下缺口口夫

口口以受命刊誌貞石用下缺口口美淑德夫人令

名惟桃之華下缺口口之原芳峩峩孤墳兮下缺

口口

唐中岳沙門釋涵如禪師行狀

大師諱涵如姓王氏上黨人也幼隨舅任灋陽事青
布明爲師年十九出家志求大法明內隱禪智當人
見讓云蘄州忍禪師所行三昧汝宜往諮受曰敬聞
命矣其後到彼會中稽請畢已祖師默辯先機卽授
其道開佛密意頓入一乘數緣非緣二種都盡到清
涼池入空寂舍可謂不動真際而知萬象者也天竺
相承本無文字入此門者唯意相傳故廬山遠涵師
禪經序云則是阿難曲承音詔遇非其人必藏之靈

府幽闕莫闕罕窺其庭如來泥曰未久阿難傳未田
地未田地傳舍那婆斯此三應真冥契于昔功在言
外經所不辯必聞軌元匠孱然無差又有達節善變
出處無際晦名寄迹無聞無木斯人不可以名部分
別有宗矣明者卽南天竺三藏法師菩提達摩紹隆
此宗步武東鄰之國傳曰神化幽蹟入魏傳可可傳
祭祭傳信信傳忍忍傳如當傳之不言者非曰其人
孰能傳哉至咸亨五年祖師滅度始終奉侍經十六
載旣淮南化掩北遊中岳後居少林寺處眾三年人
不知其量所以守本全朴弃世浮榮廉謙之德賢士

之靈也外藏名器內洽玄功庶幾之道高遁之風也對問辭簡窮精入微出有之計解空之圍也權智勇略能建沔城安人之友師者之明也垂拱二年四海標領僧眾集少林精舍請開禪法僉曰始自後魏爰降于唐帝代有五年將二百而命世之德時時間出咸以無上大寶貽諸後昆今若再振玄綱使朝聞者光復正化師聞請已辭對之曰言寂則意不亡以智則慮未滅若順諸賢之命用隆先勝之道如何敢矣猶是謙退三讓久乃許焉觀乎至人之意廣矣大矣深矣遠矣今唯叭一沔能令聖凡同入決定勇猛當

應諦受如人出火不容中斷眾皆屈申臂頃便得本心師叭一印之沔密印於眾意世界不現則是沔界此沔如空中月影出現應度者心子勤行之道在其中矣而大化既敷其事廣博羣機隱變之度毫釐不差自後頻誨學人所疑咸速發問俄然現疾乃先覺有徵爾取後一夜端坐樹下告叭遺訓重明宗極顯七日而爲一切悟彈指而震大千沔無去來延促思盡卽永昌元年歲次己丑七月二十七日午時寂然卒世春秋五十有二廕于少室山之原也諸受業沙門北就高頂起塔置石優填王釋迦像并累師之行

涓風疑幽顯遐邇競呈祥四時和玉燭七曜巡萬方
維嶽降宰輔維帝任忠良五三成一德昭我唐家皇

新羅文武王金法敏

法敏新羅王春秋子永徽元年入朝擢爲太府卿龍
朔元年襲王以其國爲雞林州大都督府授法敏都
督以納高麗叛眾略百濟地守之詔削爵發兵窮討
上元中遣使入朝謝罪詔復官爵開耀元年死

赦教

往者國家間於兩國北伐西侵暫無寧歲戰士曝骨
積於原野先王愍百姓之殘害越海請兵本欲平定

兩國雪累代之深恥全百姓之殘命百濟雖平高麗
未滅寡人克承先志旣平兩敵四隅靜泰臨陣立功
者並已酬賞但念囹圄之苦未蒙更新之澤可赦國
內罪無大小悉皆放出百姓貧寒糴入米穀者待有
年償之只還其母窮歉尤甚者子母俱免

東國通鑑

冊安勝爲高句麗王詔

公之太祖積德立功子孫相繼開地千里年將八百
至於建產兄弟禍起蕭牆覺成骨肉家國破亡宗社
湮滅生人波蕩無所托心公避難山野投身隣國百
姓不可以無主皇天必有以眷命先王正嗣惟公而

已主祭非公而誰謹遣金須彌山等冊命公爲高勾
麗王公宜撫集遺民紹興舊緒永爲隣國事同昆弟
敬哉兼遺粳米二千石甲具馬一匹綾五匹絹紬布
各十匹綿十五稱同上

遺詔

寡人運屬紛紜時當爭戰西征北討克定封疆伐叛
招攜聿寧遐邇上慰宗祧之遺顧下報父子之宿寃
自犯冒風霜遂成痼疾憂勞政教更結沉痾運往名
存奄歸大夜太子早蘊離輝久居震位宗廟之主不
可暫空太子卽於柩前嗣立且山谷遷貿人代推移

昔日萬幾之英終成一封之士徒費資財空勞人力
屬纊之後十日便於庫門外庭依西國之式以火燒
葬服輕重自有常科喪制度務從儉約同上

乞罪表

昔臣危急事若倒懸遠蒙拯救得免屠滅粉身糜骨
不足上報鴻恩碎首灰塵何能仰酬慈造然深讎百
濟逼近臣蕃告引天兵滅臣雪恥臣懼破滅自欲求
存枉被凶逆之名遂入難赦之罪臣恐事意未申先
從刑戮生爲逆命之臣死爲背恩之鬼謹錄事狀冒
死奏聞伏願少垂神聽炤審元由臣前代以來朝貢

不絕近爲百濟再虧職貢遂使聖朝命將討罪死有
餘刑伏惟皇帝陛下明同日月容光並蒙曲炤德合
乾坤動植咸被亭毒好生之德遠被昆蟲惡殺之仁
爰流翔泳倘降服捨之宥賜全腰領之恩雖死之年
猶生之日非所希冀敢陳所懷謹遣原川等拜表謝
罪伏聽勅旨兼進貢銀三百三十五兩銅三百三十
兩針四百枚牛黃一兩二錢金一兩二錢四十綜布
六匹三十綜布六十匹

同上

報薛仁貴書

我先王於貞觀二十三年入朝面奉太宗文皇帝恩

勅朕今伐高麗非有他故憐你新羅攝乎兩國每被
侵陵靡有寧歲我平定兩國平壤已南百濟土地並
乞你新羅永爲安逸新羅百姓具聞恩勅人人思奮
大事未終文帝先崩今帝踐祚復繼前恩頻蒙慈造
兄弟及兒懷金拖紫榮寵之極曩古未有粉身碎骨
望報萬一至顯慶五年聖上感先志之未終成曩日
之遺緒命將徂征大發船兵先王年衰力弱不堪行
軍追感前恩勉強至於界首遣其領兵應接大軍水
陸俱進共平一國蘇大總管留漢兵一萬新羅亦遣
弟仁泰領兵七千同鎮熊津大軍回後賊臣福信起

於河西取集餘燼圍逼府城先破外柵搃奪軍資復
攻府城幾將陷沒又於府城側近四處作城圍守某
領兵往赴以解其圍遂破賊城復運糧餉使一萬漢
兵免虎吻之危至六年福信徒黨漸多侵取江東之
地熊津留兵一千往攻兵敗匹馬不返自是熊津請
兵日夕相繼遂發兵眾往圍周留城賊知兵小遂卽
拒戰兵馬失利而歸南方諸城一時搃叛並屬福信
福信乘勝復圍府城且絕熊津餉道卽募健兒間道
救之至六月先王薨又承勅旨發兵北歸子在哀經
不能應赴含資道搃管劉德敏等至奉勅令我國供

運平壤軍糧熊津劉搃管亦使來具陳府城孤危道
斷糧盡遂共劉搃管攻拔瓮山開通道路若先運熊
津恐違勅旨若專供平壤卽恐熊津絕糧所以差遣
老弱運送熊津選簡精強擬向平壤其往熊津者在
途遇雪人馬殆盡至龍朔二年正月劉搃管共我兩
河道搃管金庾信等同運平壤軍糧風雪沍寒人馬
凍死所將兵糧不能勝致大軍旣還我兵亦回飢凍
死者不可勝數行至瓠瀘河麗兵來追我先渡河幸
勝而還熊津府城頻索穀種前後所送數萬餘斛南
運熊津北供平壤叢爾小國分供兩所人力疲極牛

馬死盡所貯倉庾坐見虛竭又留鎮天兵以時給衣
都護劉仁願遠鎮孤城數被百濟侵圍我又遣兵解
救天兵一萬衣食于我四年于茲國家恩澤雖復無
涯新羅効忠亦足矜憫至龍朔三年摠管孫仁師領
兵來救府城我兵亦發同至周留城下時倭人來助
百濟兵船千艘泊于白沙百濟精騎陣于岸上我以
驍騎先破岸陣周留失膽遂卽降下南方已定回軍
北伐任存一城執迷不降我軍欲還杜大夫承勅欲
與百濟共盟我謂百濟姦詐反覆百端今雖共盟後
恐有悔奏請停盟至麟德元年復降嚴勅盟會之事

雖非所願不敢違勅乃於就利山築壇對勅使劉仁
願歃血相盟山河爲誓畫界立封永爲疆界至乾封
二年間大摠管英國公征遼某往漢山州遣兵集於
界首先遣細諜人覘候回言大軍未到平壤且攻七
重城以待大軍其城垂陷英公使江深來云奉大摠
管處分新羅兵馬不須攻城早赴平壤卽給兵糧遣
令赴會行至水谷城聞大軍已回我亦遂來至乾封
三年遣太監金寶嘉入海稟英公約束我來赴集平
壤至五月劉右相來繼發兵馬同赴平壤某亦往漢
城州點檢兵馬此時蕃漢諸軍摠集蛇水男建出兵

欲決一戰我兵獨爲前鋒先破大陣平壤城中挫鋒縮氣英公更取我國驍騎五百人先入城門遂破平壤克成大功我兵士並云征伐已經九年人力殫盡兩國之平今日乃成必當國蒙盡忠之恩人受効力之賞英公乃謂我軍前失軍期及其入朝反謂我兵無功又早尅之城本是我國之地陷於高麗三十餘年今還得之置官以守又以此城歸于高麗夫我國自平百濟迄定高麗盡忠効力不負天朝未知何故一朝見絕至總章元年百濟渝盟越境侵犯又致書云天朝修理戰艦外託征倭欲伐新羅至咸亨元年

六月高麗謀叛以鐵留鎮朝官我欲發兵先報龔津云高麗既叛不可不伐百濟司馬禰軍來云發兵卽恐彼此相疑宜令兩國互相交質至七月入朝使金欽純等至將百濟舊地摠令割還曾未數年一與一奪我國臣民罔不失望去年九月具事奏聞遭風未達後百濟構讐誣我反叛前失貴臣之心後被百濟之譖進退惟谷未申忠欵使人琳潤至辱書仰承摠管犯冒風波遠來海外理須發使郊迎致其牛酒遠居異城未獲致禮披讀來書專以我國稱爲叛逆旣非本心惕然驚懼今略陳冤枉具錄無叛大陽雖不

回光葵藿猶懷向日摠管稟英雄之秀氣抱將相之高材天兵未出先問元由緣此來書敢陳不叛請加商量具狀申奏同上

新羅宣德王金良相

良相始為宰相建中四年新羅王乾運死國人共立之貞元元年冊為檢校太尉鷄林州刺史甯海軍使新羅王是年卒據東國通鑑謂弒王自立

遺詔

寡人本惟菲薄居位以來年不順成民用困窮此皆德不符民望政未合天心常欲禪讓退居于外羣臣

每以誠止因循至今忽遭疾疹不寤不興死生有命顧復何恨死後依佛制燒火散骨東海同上

新羅興德王金秀宗

秀宗憲德王母弟改名景徽寶曆二年立大和元年冊為嗣王開府儀同三司太尉雞林州都督如故開成元年卒

戒奢習教

人有上下位有尊卑名例不同衣服亦異俗漸澆薄民競奢華只尚異物之珍奇却嫌土產之鄙野禮數失於逼僭風俗至於陵夷敢率舊章以申明命苟或

故犯固有常刑

同上

新羅僖康王金悌隆

悌隆憲貞子唐開成元年立任位三年被弒

遺詔

寡人以眇末之資處崇高之位上恐獲罪於天下慮
失望於人夙夜兢兢若涉淵冰賴三事大夫百辟卿
士左右挾維不墜重器今者忽染疾疹至於旬日慌
惚之際恐先朝露惟祖宗大業不可無主軍國萬幾
不可暫廢願惟舒弗弗也謹請先王之令孫寡人之叔
父孝友明敏寬厚仁慈久處台衡挾贊王政可以祇

奉撫育蒼生爰釋重負委之賢德付託得人夫復何

恨伊爾多士竭力盡忠送往事居罔或違禮

同上

新羅神武王金佑徵

佑徵元聖王孫開成四年立七月卒

拜張保皋鎮海將軍教

清海鎮大使保皋嘗以兵助神考滅先朝之臣賊其

功烈可忘耶

同上

新羅眞聖女主曼定

曼定康王女弟光啟三年立任位十一年禪位于大
子曉

卷六十八
九
禪位上唐帝奏

居義仲之宮非臣素分守延陵之節是臣良圖臣姪
曉年將志學器可興宗不假外求爰從內舉近已俾
權藩寄用靖國災同上

新羅景明王朴昇英

昇英神德王之子梁貞明三年立同光三年卒

有唐新羅國故國師謚真鏡大師寶月凌空之

塔碑銘 并序

余聞高高天象非維占廣闊之名厚厚地儀不獨稱
幽元之號豈若栖禪上士悟法真人跨四大而遊化

觀風避三端而宴居翫月遂使假威禪伯歸魔□離
亂之時追令法王扶釋教於昇平之際以至慈雲再
陰佛日重輝外道咸賓彌天率服持祕印而發揮奧
旨舉元綱而宏闡真宗唯我大師卽其人大師諱審
希俗姓新金氏其先住邨王族草拔聖枝每苦鄰兵
投於我國遠祖興武大王鼇山稟氣鯨水騰精握文
符而出自相庭攜武略而高扶王室終平二敵永安
兎郡之人克奉三朝遐撫辰韓之俗考盃相道高莊
老志慕松喬水雲雖縱其閑屈朝野恨其無貴仕妣
朴氏嘗以坐而假寐夢得休□□後追思因驚有娠

便以斷其葷血虛此身心潛感幽靈冀生智子以大
中九年十二月十日誕生大師異姿瞻發神色融明
綺紈而未有童心齟齬而□□佛事聚沙成塔摘菜
獻香年九歲徑往惠目山謁圓□大師大師知有惠
牙許栖祇樹歲年雖少心意尙精勤勞則高鳳推功
敏捷則揚烏讓美俾踐僧□□離法堂咸通九年先
大師寢疾乃召大師云此法本自西天東來中國一
花啟發六葉敷榮歷代相承不令斷絕我曩遊中土
曾事百巖百巖承詞於江西繼明於南嶽南嶽則漕
溪之冢子是嵩嶺之元孫雖信衣不傳而心印相授

遠嗣如來之教長開迦葉之宗汝傳以心燈吾付爲
法信寂然無語自□洄□大師日語悲深心喪愁切
尤積亡師之慟實增絕學之憂十有九受具足戒旣
而草繫興懷□飄託跡何勞跋涉卽事巡遊訪名山
而仰止高山探□□而終尋絕境或問曰大師雖備
遊此土遍謁元關而巡歷他方須參碩彥大師答曰
自達摩付法惠可傳心禪宗所以□者何由西去貧
道已□□目方接芳塵豈料捨筏之心猶軫乘桴之
志文德初歲乾寧末年先宴坐於松溪學人雨聚暫
栖遲於雪嶽禪客風馳何往不滅曷維其已眞聖大

王遠飛睿札徵赴彤庭大師雖猥奉王言而寧墮祖業以循途多梗附表固辭可謂天外鶴聲早達於雞林之畔人中龍德難邀於象闕之旁因避煙塵欲離雲水投溟州而駐足託山寺以栖心千里又安一方蘇息無何遠聞金海西有福林忽別此山言歸南界及乎達於進禮暫以踟躕爰有口進禮城諸軍事金律熙慕道情深聞風志切候於境外迎入城中仍葺精廬諮留法軌猶如孤兒之逢慈父眾病之遇鑿王孝恭大王特遣政法大德如奐迴降綸言遙祁法力佐紫泥而兼送薰鉢憑專介而俾披信心其國主

歸依時人敬仰皆此類也豈惟肉身菩薩遠蒙聖口尊青眼律師頻感羣賢之重而已哉此寺雖地連山脈而門倚牆根大師以水石探奇煙霞選勝驂遊西岫泉唳舊墟豈謂果宜大士之情深愜神人口口所以初修茅舍方止夔與改號鳳林重開禪口先是知金海府進禮城諸軍事明義將軍金仁匡鯉庭稟訓龍闕馳誠歸仰禪門助修窳所大師心憐口口意有終焉高演元宗廣場佛道寡人祈膺丕構嗣統洪基欲資安遠之風期致禹湯之運聞大師時尊天下獨步海隅久栖北岳之陰請授東山之法興輪寺上

座釋彥琳中事省内養金文式卑辭厚禮至切嘉招
大師謂眾云雖在深山屬於率土况因付囑難拒王
臣貞明四年冬十月忽出門屆於□輦至十一月四
日寡人整其冕服稍淨襟懷延入藥宮敬邀蘭殿特
表師資之禮恭申鑽仰之儀大師高拂毳衣直昇繩
榻說理國安民之術敷歸僧□□之方寡人喜仰慈
顏親聞妙旨感激而重重避席忻歡而一一書紳此
日隨大師上殿者八十人徒中有上足景質禪師仰
扣鐘鳴潛迴鏡智大師撞擊聲在春容曉日之暎羣
山清風之和萬籟縱容演法偏超空有之邊慷慨譚

禪實出境塵之表莫知其極誰識其端翌日遂命百
寮詣於所止同列稱□仍差高品上尊號曰法膺大
師此則盡爲師表常仰德尊恭著鴻名以光元教其
後大師已歸舊隱重啟芳筵諭諸學於道灰俱傳法
要援羣生於塗炭□質慈風則必忽患微疴猶多羸
色大眾疑入兩楹之夢預含雙樹之悲龍德三年四
月二十四日詰日告眾曰諸法皆空萬緣俱寂言其
寄世宛若行雲汝等勤以住持慎無悲哭右脅而臥
示滅於鳳林禪堂俗年七十僧臘五十於時天色氤
氳日光慘澹山崩川竭草悴樹枯山禽於是苦啼野

獸以之悲吼門人等號奉色身假寐於寺之北嶺寡
人忽聆遷化身惻惻情仍遣昭元僧榮會法師先令
帛祭至於三七特差中使賫送賻資又以贈謚眞鏡
大師塔名瑞月凌空之塔大師天資惠悟嶽降精靈
懸慈鏡於靈臺挂戒珠於識宇於是隨方宏化逐境
示慈知無不爲綽有餘裕至於終世心牢無瞥起之
情雖在片時體正絕塵勞之染傳法弟子景質禪師
等五百餘人皆傳心印各寶髻珠俱栖寶塔之旁共
守禪林之閭遠陳行狀請勒貞珉寡人才謝凌雲學
非對□柔翰敢揚其禪德菲詞希播其道風遽裁熊

耳之銘焉慙梁武追製天台之偈不媿隨皇其詞云
釋迦法付大龜氏十劫流轉示後來心滅法流何日
絕道存人去幾時迴傳矣哲人憂迷路生於浮世降
聖胎愆海波高橫一葦邪山路險軫三材方忻宴坐
鍊花發忽歎泥洹寶月推霜霑鶴樹悲長悴霧暗雞
山待一開龍德四年歲次甲申四月一日建

新羅敬順王金傳

傳孝宗之子爲甄萱所立唐天成三年立在位八年
降于高麗

上高麗王建書

本國久經亂離歷數已窮無復望保基業願以臣禮

見東國通鑑

金庾信

庾信舒玄子官上州將軍梁州都督征西大將軍平百濟滅高句麗皆其功卒年七十九追贈王爵

中嶽告天誓詞

敵國無道侵擾我封疆略無甯歲一介微臣不量材力志清禍亂惟天降監假手於我同上

祭落星文

天道則陽剛而陰柔人道則君尊而臣卑苟或易之

即為大亂今毗曇等以臣而謀君自下而犯上此所謂亂臣賊子人神所同嫉天地所不容今天若無意於此而反見星怪於主城此臣所疑惑而不喻者也惟天之威從人之欲善善惡惡無作神羞同上

薛聰

聰字聰智博學善屬文能以方言解九經義訓導後生

諷羅王文

唯臣聞昔花王之始來也植之香園護以翠幕當三春而發艷凌百花而獨出於是艷艷之靈天天之英

無不奔走上謁忽有一佳人名曰牆薇朱顏玉齒鮮
粧靚服伶俜而來綽約而前曰妾聞王之令德願薦
枕於香帷王其容我乎又有一丈夫名曰白頭翁布
衣韋帶戴白持杖龍鍾而步偃僂而前曰僕在京城
之外居大道之旁竊謂左右供給膏梁雖足巾衍儲
藏須有良藥故曰雖有絲麻無棄菅蒯不識王亦有
意乎王曰丈夫之言亦有道理而佳人難得將如之
何丈夫曰凡爲君者莫不親近老成而興昵比天艷
兩亡然而天艷易合老成難親是以夏姬亡陳西施
滅吳孟軻不遇以終身馮唐郎潛而皓首自古如此

吾其奈何花王謝曰吾過矣

同上

金弼奚

弼奚官翰林郎朝散大夫兼太子朝議郎

聖德大王銅鐘之銘

夫至道包含於形象之外視之不能見其原大音震
動於天地之間聽之不能聞其響是故憑開假說觀
三眞之奧載懸舉神鐘悟一乘之圓音夫其鐘也稽
之佛生則驗在於蜀賦尊之常鄉則始制於鼓延空
而能鳴其響不竭重爲難轉其體不褻所以王者元
功克銘其上羣生離苦亦在其中也伏惟聖德大王

德共山河而並峻名齊日月而高懸舉忠良而撫俗崇禮樂而觀風野務本農市無濫物時嫌金玉世尙文才不意子虛有心老誠四十餘年臨邦勤政一無干戈驚擾百姓□□四方鄰國萬里歸賓惟有欽風之望未曾飛矢之窺燕秦用人齊晉替霸豈可並輪雙轡而言矣雙樹之期難測千秋之夜易長宴駕已來於今三十四年也頃者孝嗣景德大王在世之日繼守丕業監撫庶機早隔慈規對星霜而起戀重違嚴訓臨闕殿而增悲追遠之情轉悽益魂之心更切敬捨銅一十二萬斤欲鑄大鐘一口立志未成奄爲

就世今我聖上行合祖宗意符至理殊祥異於千古令德冠於當時六御龍雲蔭洒於玉階九天雷鼓震響於金闕草木之林離離乎外境非煙之色煥煥乎京師此則報茲誕生之日應其臨政之時也仰惟大君恩若地平化黔黎於仁教心如天鏡獎人子之孝誠是知朝於元舅之賢夕於忠臣之輔無言不擇何行有懋乃願遺言遂成宿意爾其有司辨事工匠盡模歲次大淵月惟大呂是時日月借暉陰陽調氣風和天靜神器化成壯如嶽立聲若龍吟上徹於有頂之巔潛通於無底之下見之者稱奇聞之者受賜願

卷六十八
七
茲妙因奉翊尊靈聽普聞之清響登無說之法筵契
三明之勝心居一乘之眞境乃至瓊萼之叢共金柯
以永茂邦家之業將鐵圍而彌昌有情無識慧海同
波咸出塵區並昇覺路臣弼奚文拙無才敢奉聖詔
貸班超之筆隨陸佐之言述其明旨銘記於鐘也其
詞曰

紫極懸象黃輿啟方山河鎮別區宇分張東海之上
眾仙所藏地居桃壑界接扶桑爰有我國合爲一鄉
元元聖德曠代彌新妙妙清化遐邇克臻將恩被遠
與物均霑茂矣千葉安乎萬倫愁雲忽脫慧日無春

恭恭孝嗣繼業於機治俗仍古移風豈違日思嚴訓
常慕慈輝更以修福天鐘爲祈偉哉我后威德不輕
寶瑞頻出靈符每生主賢天佐時泰國平追遠惟勤
隨所願成乃顧遺命于斯寫鐘神人獎力珍器形容
震威暘谷清韻朔峯聞見俱信芳緣允鍾能保魔鬼
救之魚龍圓空神體方現聖蹤永是鴻福恆恆轉重
大曆六年歲次辛酉十二月十四日鑄鐘

金陸珍

陸珍官守大南令元和四年入唐朝貢使

唐鑿藏寺碑

守大南令臣金陸珍奉缺考有測記予若存者教亦
 善數歸于九缺有以雙忘缺而不覺遍法界而冥立缺有
 是微塵之刹沙數之區競禮微言爭尚缺有能與於此
 乎鑿藏寺者缺二迴絕累以削成所寄真奧自生虛
 白碧澗千尋中宮奉為缺有明業繼斷鼇功崇御辨運
 璇璣而照寓德合天心握金鏡缺有何圖天道將變書
 物告凶享國不永一朝晏駕中宮缺身內極而喪禮
 也制度存焉必誠必信勿之有悔送終之事密藏鬱
 陶研精寤寐求之思所以幽贊真休光啟元福者西
 方府之紆財召彼名匠各有司存就於此寺奉造阿

彌陀佛像一見真人於石塔東南崗上之樹下西面
 而坐為大眾說法既覺缺有巉岬溪澗激迅維石巖巖
 山有朽壤匠者不顧咸謂不詳乃缺有之固正當殿立
 有若天扶於時見者愕然而驚莫不缺有至百慮多岐
 一致於誠誠也者可以動天地缺有既得匪棘其欲子
 來成之其像則下右第一石
上也當此之時豈缺有基壤之剔之更將缺有歟是歟故
 知萬法殊缺有伴之材畢至班石之巧缺有普照八十種
 好出眾妙缺有鋪綺檻朝日暎而炫耀缺有苦節潔行修
 身專思法缺有德貞順立節著於稱道缺有路若斯之盛

乎欲比有缺燕然之作便察膺揚有缺物混成載我以形

勞我有缺慧炬用拯迷類正教難測有缺鼇業泰登樞位

襲聲教有缺忘不忘維何思崇冥祐有缺窳紛散香花周

繞天人下缺右第二石

金力奇

力奇元和三年新羅入朝貢使

請授故主俊邕封冊歸國表

貞元十六年奉詔冊臣故主金俊邕為新羅王母申

氏為太妃妻叔氏為王妃冊使章丹至中路知俊邕

薨其冊却迴在中書省今臣還國伏請授臣以歸唐會

要九十五

金柱弼

柱弼長慶二年新羅國朝貢使

請牒傍海州縣任新羅良口歸國奏

先蒙恩勅禁賣良口使任從所適有老弱者栖栖無

家多寄傍海村鄉願歸無路伏乞牒諸道傍海州縣

每有船次便賜任歸不令州縣制約唐會要八十六

金穎

穎官守定邊府司馬朝請郎

新羅國武州迦智山寶林寺謚普照禪師靈墟

聞夫禪境元寂正覺希夷難測難知如空如海故龍
樹師子之尊者喻芭蕉於西天宏忍惠能之祖師譚
醍醐於震旦蓋埽因果之跡離色相之鄉登大牛之
車入罔象之域是以智光遠照惠澤遐流灑法雨於
昏衢布慈雲於覺路見空者一息而越彼邪山有爲
永劫而滯於黑業矧乎末法之世像教紛紜罕契真
空互持偏見如擘水求月搓繩繫風徒有勞於六情
豈可得其至理其於眾生爲舍那舍那爲眾生眾生
不知在舍那法界之中縱橫造業舍那亦不知眾生

碑銘

在苞舍之內湛然常寂豈非迷耶如此迷者大不迷
矣知其迷惟我禪師乎或謂此說爲蕩落之言吁道
經云上士聞道崇而奉之中士聞道撫掌而笑不笑
不足以爲道也此之謂矣禪師諱體澄宗姓金熊津
人也家承令望門襲仁風是以慶自天鍾德從嶽降
孝義旌表於鄉里禮樂冠蓋於軒裳者也禪師託體
之年尊夫人夢日輪駕空乘光貫腹因之驚悟遂覺
有懷及逾晷月不之誕生尊夫人追尋瑞夢誓禱良
因膳徹殿脩飲斷醪醴胎訓淨戒騰事福田由是克
解分蓐之憂允叶弄璋之慶禪師貌雄嶽立氣潤河

靈輪齒自然金髮特異閭里聲歎戚口咸驚從襁褓
之年宛有出塵之趣登齠齻之歲永懷捨俗之緣二
親知其富貴難留財色莫繫許其出家遊學策杖等
師投花山勸法師座下聽口爲業樞衣請益夙夜精
勤觸目無遺歷耳必記常以口治麤鄙藻練僧儀積
仁順而煩惱蠲除習虛靜而神通妙用超然出眾卓
爾不羣後以大和丁未歲至加良峽山普願寺受具
戒一入壇場七宵行道俄有異雉忽爾馴飛有稽古
者曰昔向陳倉用顯霸王之道今來寶地將興法主
之徵者焉初道儀大師者受心印於西堂後歸我國

說其禪理時人雅尚經教與習觀存神之法未臻其
無爲任運之宗以爲虛誕不之崇重有若達摩不過
梁武也由是知時未集隱於山林付法於廉居禪師
居雪山億聖寺傳祖心闢師教我禪師往而事焉淨
修一心求出三界以命非命以軀非軀禪師察志氣
非偶素概殊常付元珠授法印至開成二年丁巳與
同學真育虛會等路出滄波西入華夏參善知識歷
三五州知其法界嗜欲共同性相無異乃曰祖師所
說無以爲加何勞遠適止足意興五年春二月隨平
盧使歸舊國化故鄉於是檀越傾心釋教繼踵百川

之朝鼇壑羣領之宗鷲山未足爲喻也遂次武州黃壑蘭若時大中十三禩龍集於析木之津憲安大王卽位之後年也大王聆風仰道勞於夢魂願闢禪扉請入京轂夏六月教遣長沙縣副守金彥卿賫茶藥迎之所以處雲巖之安兼屬結戒之月託淨名之病陳六祖之辭冬十月教又遣道俗使雲巖郡僧正連訓法師奉宸馮瑄等宣諭綸旨請移居迦智山寺遂飛金錫遷入山門其山則元表大德之舊居也表德以法力施於有政是以乾元二年特教植長生標柱至今存焉宣帝十四年仲春副守金彥卿夙陳弟子

之禮嘗爲入室之賓減清俸出私財市鐵二千五百斤鑄盧舍那佛一軀以莊禪師所居梵宇教下望水里南等宅共出金一百六十分租二千斛助充裝飭功德寺隸宣教省咸通辛巳歲以十方施資廣其禪宇慶畢功日禪師蒞焉虹之與蜺貫徹堂內分輝耀室渥彩燭人此乃堅牢告祥娑迦表瑞也廣明元年三月九日告諸依止曰吾今生報業盡就木兆成汝等當善護持無至曠怠至孟夏中旬二日雷電一山自酉至戌十三日子夜上方地震及天曉右脅臥終享齡七十有七僧臘五十二於是弟子英惠清奘等

八百餘人義深考妣情感乾坤追慕攀號聲動溪谷以其月十四日葬於王山松臺壘塔安厝嗚呼禪師名留於此魂魄何之生離五濁超入八空樂寂滅而不歸遺法林而永秀豈惟濟生靈於沙畹實亦裨聖化於三韓禮云別子爲祖康成注云子若始來在此國者後世以爲祖是以達摩爲唐第一祖我國則以儀大師爲第一祖居禪師爲第二祖我師爲第三祖矣中和三年春三月十五日門人義車等纂集行狀遠詣王居請建碑銘用光佛道聖上慕真空之理閱巖師之心教所司定謚曰普照塔號彰聖寺額寶林

褒其禪宗禮也翌日又詔徵臣修撰碑讚垂裕後人臣兢惶承命直筆爲詞但以供奉宸衷敢避文林嗤哂詞曰

禪心不定兮至理歸空如活琉璃兮在有無中神莫通照兮鬼其敢衝守無不足兮施之無窮劫盡恆沙兮妙用靡終其一寥廓舍邨苞育萬物蠢蠢眾生違舍邨律律旣罔體復誰是佛迷之又迷道乃斯畢其二大哉禪師生乎海域克鍊菩提精修惠德觀空離空見色非色強稱爲印難名所得其三有爲世界無數因緣境來神動風起波翻須調意馬勤伏心猿以斯爲寶

施於後賢其四乘波若舟涉愛河水彼岸既登惟佛是
擬牛車已到火宅任燬法相雖存哲人其萎其五叢林
無主山門若空錫放眾虎鉢遺羣龍惟餘香火追想
音容刊此真石祀法將雄其六中和四年歲次甲辰季
秋九月戊午朔旬有九日丙子建

金口名

新羅文武王陵之碑

上後兵殊配天統物畫野經圻積德□□匡時濟難
應神缺靈命缺派鯨津氏映三山之闕東拒閃悟之
境南鄰□桂之□□接黃龍駕朱蒙缺承白武仰缺

間盡善其能名實兩濟德位兼隆地跨八負勳超三
□巍巍蕩蕩不可得而稱者我新羅缺君靈源自質
繼昌基於火官之后峻構方隆由是克□□枝載生
英異稔侯祭天之肩傅七葉以缺焉十五代祖星漢
王降質圓穹誕靈仙岳肇臨□□似對玉欄始蔭祥
林如觀石紐坐金輿而缺大王思術深長風姿英拔
量同江海威若雷霆□地□□方卷跡停烽罷候
萬里澄氛克勤開缺簡□之德內平外成光大之風
邇安遠肅□功盛□□於將來屢粹疑貞垂裕於
後裔缺挹□舍謙乃聖哲之奇恩以撫人竟以御物

字缺四知其際承德者咸識其鄰聲溢間河缺峯而疎
 幹契半干而誕命居得一以□□照惟幾於丹府義
 符性與洞精鑿缺恬□輔質情源湛湛吞納□□襟
 字缺六握話言成範容止可觀學綜古缺之訓姬室拜
 橋梓之缺大唐太宗文武聖皇帝應鴻祉缺宮車晏
 駕邊密在辰以缺舜海而霑有截懸堯景以燭無垠
 著□□□而光九列掌天府以缺感通天使息其
 青蘋安然利涉缺近遑鄰好頻行首鼠之謀外信缺
 熊津道行軍大總管以君王缺列陣黃山蜩聚鳴張
 欲申距缺至賊都元惡泥首轅門佐吏缺三年而已

至龍朔元年缺所寶惟賢為善最樂悠仁缺朝野懽
 娛縱以無為無缺貺更興太伯之基德缺之風北接
 挹婁蜂缺詔君王使持節缺軍落於天上旌缺之謀
 出如反手巧缺丸山有紀功之將以缺真九合一匡
 東征西缺宮前寢時年五十六缺牧哥其上狐兔穴
 其傍缺燒葬即以其月十日火缺妣天皇大帝缺王
 禮也君王局量缺國之方勤恤於八政缺歸乃百代
 之賢王寔干缺清徽如士不假三言識駿缺而開沼
 髣髴濠梁延錦石以缺之賓聆嘉聲而霧集為是朝
 多缺即入昇忘歸射熊若返太子雞缺丹青洽於麟

閣竹帛毀於芸臺缺餘下拜之碣迺為銘曰

缺侍星精缺域千枝延照三山表色盛德遙傳缺道

德像棲梧缺允武允文多才多藝憂人吞蛭尊缺九

伐親命三軍缺威恩赫奕茫茫沮滅聿來充役蠹缺

欽風丹雘屢出缺鎮空缺雄赤鳥呈災黃熊表崇俄

隨風燭忽缺命疑真貴道賤身欽味釋缺葬以積薪

缺滅粉骨鯨津嗣主允恭因心孝友罔缺鴻名與天

長兮地久

闕名

新羅鏡文

三水中四維下上帝降子於辰馬先操雞後搏鴨此

謂運滿一三甲暗登天明理地遇子年中與大事混

蹤跡沌名姓混沌誰知真興聖振法雷揮神電於已

年中二龍見一則藏身青木中一則現形黑金東智

者見愚者盲與雲注雨與人征或見盛或視衰盛衰

為滅惡塵滓此一龍子三四遞代相承六甲子此四

維定滅丑越海來降須待酉此文若見于明王國泰

人安帝永昌吾之記高麗史

Table with 10 columns and 10 rows of text. The text is extremely faint and illegible.

